

**Syphilis sive morbus Gallicus / Carmen ad optimarum editionum fidem  
edidit notis et prolegomenis ad historiam morbi Gallici facientibus instruxit  
Ludovicus Choulant.**

### **Contributors**

Fracastoro, Girolamo, 1478-1553  
Choulant, Ludwig, 1791-1861

### **Publication/Creation**

Lipsiae : L. Voss, 1830.

### **Persistent URL**

<https://wellcomecollection.org/works/jh5wgcc8>

### **License and attribution**

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection  
183 Euston Road  
London NW1 2BE UK  
T +44 (0)20 7611 8722  
E [library@wellcomecollection.org](mailto:library@wellcomecollection.org)  
<https://wellcomecollection.org>





Tracastorn

1/8

Fix. 6  
16

9<sup>0</sup>

23, 165/A

85.15.1

eye

1/6/0

page  
12/7/11





HIERONYMI FRACASTORII  
**SYPHILIS**

SIVE  
**MORBUS GALLICUS.**

---

**CARMEN**

AD OPTIMARUM EDITIONUM FIDEM EDIDIT  
NOTIS ET PROLEGOMENIS AD HISTORIAM MORBI  
GALLICI FACIENTIBUS INSTRUXIT

**Ludovicus Choulant**

PRAXEOS MEDICAE IN ACADEMIA MEDICA DRESDENSI  
PROFESSOR.

---

**LIPSIAE**

APUD LEOPOLDUM VOSS.

**1830.**





**V I R O**

**DE RE MEDICA OPTIME MERITO**

**GEORGIO CHRIST. THEOPHILO**

**L. B. DE WEDEKIND**

**MAGNO DUCI HASSIAE A CONSILIIS INTIMIS ET ARCHIATRO  
ETC. ETC. ETC.**

**DOCTORIS MEDICINAE ET CHIRURGIAE  
HONORES**

**ANTE HOS QUINQUAGINTA ANNOS**

**D. XXIV. M. IUNII MDCCLXXX**

**IN ALMA LITERARUM UNIVERSITATE  
GOETTINGENSI**

**RITE ACCEPTOS**

***PIA MENTE GRATULATUR***

**ET HANC**

**CARMINIS FRACASTORIANI EDITIONEM**

**D. D. D.**

***LUDOVICUS CHOULANT.***



THE KENNEDY COLLECTION  
GEORGE CHRIST THEOPHILUS

L. B. DE WILDEKIND

THE KENNEDY COLLECTION  
THE KENNEDY COLLECTION

THE KENNEDY COLLECTION  
THE KENNEDY COLLECTION

THE KENNEDY COLLECTION  
THE KENNEDY COLLECTION

THE KENNEDY COLLECTION  
THE KENNEDY COLLECTION

THE KENNEDY COLLECTION  
THE KENNEDY COLLECTION

THE KENNEDY COLLECTION  
THE KENNEDY COLLECTION

THE KENNEDY COLLECTION  
THE KENNEDY COLLECTION

THE KENNEDY COLLECTION  
THE KENNEDY COLLECTION

THE KENNEDY COLLECTION  
THE KENNEDY COLLECTION

THE KENNEDY COLLECTION  
THE KENNEDY COLLECTION

THE KENNEDY COLLECTION  
THE KENNEDY COLLECTION

THE KENNEDY COLLECTION  
THE KENNEDY COLLECTION

*Tertium hoc ipso anno excurrit saeculum, ex quo Fracastorii carmen de Syphilide primo quantum novimus typis excusum est, ita ut illi nunc redeat fausto omine saecularis solennitas. Quartum scilicet saeculum felicius auspicabitur, si semisaeculari festo TIBI hodie celebrando gratulabundum accedere ei licuerit. Ipsa carminis, cui nullum post instauratas literas in latina lingua par existere eruditi contendunt, concinnitas et elegantia, et rei pertractatae his diebus in scholis medicorum renovata gravitas, novam eius editionem suadere videbantur. In qua curanda id summae mihi*



*curae fuit, ut Fracastorii verba ad optimos et antiquissimos textus restituta et paucis illustrata exhiberet et ut Fracastoriana memoria TUOQUE nomine non prorsus indigna videri posset aequis harum rerum arbitris. TU vero, etsi parum haec assecutus fuerim,*

„NE NOSTROS CONTEMNE ORSUS MEDICUMQUE  
LABOREM“!

---

## CONSPECTUS.

---

### *Prolegomena.*

I. De origine morbi Gallici . . . . .	1
II. Hieronymi Fracastorii vita . . . . .	10

### *Fracastorii Syphilis.*

Liber primus . . . . .	19
Liber secundus . . . . .	35
Liber tertius . . . . .	51
Notae . . . . .	66

---



THE UNIVERSITY OF CHICAGO  
LIBRARY  
1215 EAST 58TH STREET  
CHICAGO, ILL. 60637  
U.S.A.

1970  
1971  
1972  
1973  
1974

## I.

### DE ORIGINE MORBI GALLICI.

---

**M**ORBUS Gallicus, quem Fracastorius primus omnium quantum novimus Syphilidem dixit, dubiae est originis, quam scilicet maxime variam varii auctores ei attribuerunt. Alii morbum ex America nuper detecta derivabant atque a Columbo navigatore eiusque sociis in Hispaniam, a militibus Hispanis in Italiam, a militibus Gallis ex Italia sub Carolo VIII. in patriam reducibus in Galliam esse perductum contendebant, quam sententiam a Fallopio (de morb. Gall.) iam prolatam, ab Astrucio et Girtannero defensam, nunc vero ducibus Sanchezio et Henslero penitus refutatam videmus et derelictam. Fuerunt alii qui ex Asia morbum deducerent, ita quidem ut vel Indias Orientales accusarent, uti Schaufuss, qui per Cingaros luem in Europae regiones disseminatam putat, vel potius Asiam anteriorem, ut Schwediauer aliique. Fuerunt dein, qui ex Indiis Australibus morbum ortum esse



putarent, ut Reinholdus Forster, et minus certe affirmans Turnbull. Alii vero ex Africa, fertili malorum morborumque matre, natum putant, uti Sydenham, qui ex morbo apud Nigritas Guineae endemio, the Yaws dicto, derivat; uti etiam Grunert et Thiene, qui per Maranos ex Hispania depulsos per omnem Europam dissipatum credunt. Quum autem omnes scriptores, quos hucusque diximus, extra Europae fines morbi originem quaerant, sunt alii, qui in contrariam sententiam abeuntes syphilidem dicant in Europae regionibus indigenam. Et inter hos ipsos dissensio est, aliis scilicet syphilidem dicentibus morbum novum, antiquum aliis. Qui morbum novum putant et in ipsa Europa ortum, patriam eius vel Galliam faciunt, ut Itali, vel Italiam, ut Galli, vel Hispaniam, ut Belgae cum Italis et Gallis, vel Daciam, ut nuper Witzmann; dein morbum vel ex lepra ortum putant eiusque mitiorem esse formam, uti Sprengel, Struve aliique plurimi, vel epidemium morbum putant illis temporibus ortum vel astrorum maligno concursu, vel tempestatum vel inundationum vel denique morum pessime corruptorum vitio. Qui vero morbum antiquum esse putant, syphilidi adscribunt omnia in locis obscenis vitia, de quibus scriptores vel antiquissimi iam dixerunt; hanc sententiam tumentur Alliot, Becket, Maynwaring aliique.

Quum neque meum esse possit neque omnino huius loci, tantas componere lites, liceat breviter meam quoque de hac re sententiam interponere



ne in tanta opinionum copia et diversitate mihi soli ea penitus deesse videatur.

Lepa occidentalis, quae circa saeculum undecimum et duodecimum malignitatis summum culmen erat adeptæ, mitescere coepit his ipsis Europae regionibus saeculo decimo quarto, disparere versus finem saeculi decimi quinti. Hoc ipso tempore, scilicet saeculo decimo quinto ad finem vergente, natus est vel astrorum vel tempestatum vel morum vitio variis in locis simul morbus aliquis epidemius, cuius potiora symptomata in cute apparebant et interiora corporis per dolores et ulcera petebant. Morbus hic novus omnes veteris leprae reliquias consumsit quasi et in suam naturam mutavit, ut non amplius leprae cerneretur portentosa facies, sed morbus novus, leprae similis, non minus horrendus, sed per non admodum longa temporum intervalla aperte mitescens. Ita factum est, ut syphilis dici possit novus morbus et antiquus simul, quippe quae lepra sit ope epidemiae tunc temporis natae novam mitioremque formam adeptæ. Cuius originis leprosa signa et vestigia sunt partim nunc adhuc in syphilide observanda: cutis turpitudine, quae nunc, si maculas et condylomata exceperis, fere disparuit; ulcera faucium ex leprosum raudine nata; ossium dolores tumoresque et caries, quae cum leprosum ossibus deformatis conveniunt. Obscenarum partium affectiones partim leprosum hominum salacitati respondent, partim novo morbo morumque pravitate illorum temporum de-



bentur, partim antiquissima sunt vitia, syphilidi minime propria, sed ei perperam adscripta. Quum itaque syphilis hoc modo per tria saecula grassata sit, ut semper mitior evaderet lepraeque vestigia pedetentim deponeret, sperandum est, fore ut aliquando penitus evanescat, simplicissimam formam absque dyscratica labe induat et sic hydrargyro denique non amplius ad curationem egeat. Ad hoc vero temporis punctum speratum sperandumque nostris diebus nondum accessimus.

Quae res quum denuo per magnae contentionis disputationes tractatae sint satis alacriter, sperare licet, fore ut aliquis historica et medica doctrina bene imbutus, a partium studio et ignorantiae temeritate longe remotus, assiduitate et eruditionis modestia praeditus, syphilidis obscuras origines denuo perquirat, repertaque candide impertiat. Arduum sane opus et taedii plenum, sed dignum viro docto, et perutile rei medicae non minus quam historiae generis humani. Huic operi tentando quum me ipsum omnino imparem sentirem, pro viribus vero meas in hac re partes conferre optarem, exhibui his ipsis pagellis

1. *Scriptorum historicorum de morbo Gallico,*

2. *Collectionum de morbo Gallico*

accuratam et quantum fieri potuit plenam enumerationem, ut his adminiculis invitarem medicum quendam eruditum ad condendam veriore huius morbi historiam.

---



## SCRIPTA HISTORICA DE MORBO GALLICO.

*Carol. PATIN* († 1693) *luem veneream non esse morbum novum oratio*. Patav. 1687. 4.

*Jean Bapt. Faust ALLIOT* († 1730) et *Jo. Franc. LEAULTE* *quaestio medica an morbus antiquus syphilis*. Paris. 1717. 4. (defenditur morbi antiquitas).

*Jo. Zachar PLATNER* († 1747) *progr. de morbo Campano Horatii*. Lips. 1732. 4. Recus. in *Opuscc. T. II.* p. 21—28. (locum Horat. Satyr. I. 5. 62. non omnino ad syphilidem refert, sed ad consequentias vitae luxuriosae).

*Jo. ASTRUC* († 1766) *de morbis venereis libri sex*. Paris. 1736. 4. Recus. Paris. (Basil.) 1738. 4. Angl. vers. a *Will. Barrowby*, Lond. 1737. 8. — Editio altera plenior: *De morbis venereis libri novem*. Paris. 1740. 4. Vol. I. II.; Paris. 1743. 12. Vol. I—IV. Libros quatuor priores gallice vert. *Augustin François Jault*, Paris. 1740. 12. Vol. I—III. — Editio tertia aucta per *Jo. Astruc* et *Ant. Louis*, Paris. 1755. 12. Vol. I—IV. Recusa Venet. 1760. 4. additis duabus *Gerardi van Swieten* epistolis de mercurio sublimato et *Jos. Mar. Xaver. Bertini* diss. de usu mercurii. (Angl. vert. *Sam. Chapman*, Lond. 1755. 8.; German. vert. *Jo. Gottlob Heise*, Frankfurt u. Leipz. 1764. 8.) — Editio quarta: Paris. 1773. 12. Vol. I—IV. — Editio quinta, quam curavit *Anton. Louis*, Paris. 1777. 12. Vol. I—IV. (Astrucci opus doctum et diffusum nimis acriter originem Americanam defendit).

*Anton. Nunhez Ribeiro SANCHEZ* († 1783) *diss. sur l'origine de la maladie vénérienne, dans laquelle on prouve qu'elle n'a point été apportée de l'Amérique et qu'elle a commencé en Europe par une épidémie*. Paris. 1762. 12. (German. vert. *Georg Heinr. Weber*, Brem. 1775. 8.) Novo titulo ornata: Paris. 1765. 12.

— *examen historique sur l'apparition de la maladie vénérienne en Europe et sur la nature de cette épidémie*. Lisbonne. 1774. 12. Cum priore dissertatione recudi fecit *Hieron. David Gaub*, Leid. 1777. 8. (utrumque opusculum anonymum est et contra Astrucci opinionem de syphildis origine Americana docte pugnat).

*Marmaduke BERDOE* *an essay on the pudendagra*. Bath. 1771. 8.



*Philipp Gabriel HENSLER* (†1805) *Geschichte der Lustseuche, die zu Ende des XV. Jahrhunderts in Europa ausbrach. Erster Band.* Altona. 1783. 8.

— — *über den westindischen Ursprung der Lustseuche* Hamburg. 1789. 8. (est pars posterior secundi voluminis operi proxime antecedenti destinati, quod volumen vero integrum nunquam apparuit; opus doctissimum pugnat contra originem Americanam).

— — *progr. de herpete seu formica Veterum labis venerae non prorsus experte.* Kilon. 1801. 8.

*La America vindicada de la calumnia de haber sido madre del mal venereo.* Madrid. 1785. 4.

*William TURNBULL* *an inquiry into the origin and antiquity of the lues venerea, with observations on its introduction and progress in the Islands of the South-Sea.* Lond. 1786. 8. German. vert. *Christian Friedrich Michaelis.* Zittau und Leipzig. 1789. 8. (defendit auctor originem Americanam, dubitat, utrum ab Anglis Gallisve advecta sit syphilis ad insulas Australes, an ibi iam prius extiterit).

*SARMIENTO* *antigüedad de las bubas.* Madrid. 1787. 8.

*Christoph GIRTANNER* (†1800) *Abhandlung über die venerische Krankheit.* Göttingen. 1788. 1789. 8. Vol. I—III. Volumen primum habuit editiones quatuor, quarum postremam curavit *Ludov. Guil. Christoph. Cappel*, Götting. 1802. 8.; Volumen secundum et tertium recudebantur Götting. 1795. 8. (continet seriem scriptorum de lue venerea sat numerosam usque ad ipsa auctoris tempora; sed neque fideliter excerpta, neque candide diiudicata, acriter scilicet pugnatur pro origine Americana armis non semper adeo laudabilibus).

*Curt. SPRENGEL* *diss. de ulceribus virgae, tentamen historico-chirurgicum.* Halae. 1790. 8. (multo magis huc faciunt doctissimi Auctoris notae ad germanicam versionem operis Perenotti di Cigliano de infectione venerea, quae versio apparuit Lipsiae. 1791. 8. Cf. *Sprengel Beiträge zur Geschichte der Medicin*, III, 59 sq. et eius *Geschichte der Arzneikunde* Bd. II.)

*Christian Godofred. GRUNER* (†1815) *morbi Gallici originis Maranicae.* Jenae. 1793. 4. (redit hoc programma in eiusdem auctoris *Scriptor. de morbo Gallico*, quod opus dicemus inter collectiones. Cf. *Almanach für Ärzte und Nichtärzte* 1783, p. 285; 1784, p. 224; 1788, p. 237; 1790, p. 139; 1792, p. 51. 188; 1793, p. 69; 1794, p. 229; 1797, p. 227).

*Sim. N. H. LINGUET* (†1794) *histoire politique et philosophique du Mal de Naples.* Paris 1796. (?) 8.

*Jul. Heinr. Gottlieb SCHLEGEL* *Versuch einer Geschichte des Streites über die Identität des Venus- und Trippergiftes.* Jena. 1796. 8. (antea diss. inaug. ibid. 1795.)



## SCRIPTA HISTORICA DE MORBO GALLICO. 7

*SCHAUFUSS* neueste Entdeckungen über das Vaterland und die Verbreitung der Pocken und der Lustseuche. Leipz. 1805. 8. (patriam utriusque morbi esse Asiam, luem veneream per Cingaros in Europam fuisse disseminatam).

*Carl Sam. TÖRNBERG* diss. sistens sententiarum de vera morbi Gallici origine synopsis historicam Jenae. 1807. 8.

*Gust. Adolph WERNER* diss. de origine ac progressu luis venereae. Lips. 1819. 4. (putatur syphilis morbus antiquus et ex lepra et nimia libidine ortus).

*J. L. W. WENDT* bydrag til historien af den veneriske sygdoms begyndelse og fremgang i Danmark. Kiöbenhavn. 1820. 8.

*Nicol. BARBANTINI* notizie istoriche concernenti il contagio venereo, le quali precedono la sua opera sopra questo contagio. Lucca. 1820. 8.

*Domenico THIENE* lettere sulla storia de' mali venerei. Venezia. 1823. 8. (epistolae novem sat memorabiles; defenditur antiquitas morbi et origo Africana).

*V. A. HUBER* Bemerkungen über die Geschichte und Behandlung der venerischen Krankheiten. Stuttgart und Tübingen. 1825. 8. (parvae molis libellus sed lectu dignissimus).

*A. Pet. de JURGENEW* diss. sistens luis venereae apud Veteres vestigia. Dorpat. 1826. 8.

*Frid. Alex. SIMON (jun.)* über den Sublimat und die Inunctionscur. Ein historisch-kritischer Versuch. Hamburg. 1826. 8.

— — Versuch einer kritischen Geschichte der örtlichen Lustübel und ihres Verhältnisses zu der Ende des XV. Jahrhunderts erschienenen Lustseuche. Erster Theil. Hamburg. 1830. 8. (gonorrhoeam complectens eiusque antiquitates).

---

## COLLECTIONES DE MORBO GALLICO.

*PAPIAE*, 1516. fol. ex offic. Bernhardini de Garaldis. (Astruc II. 623.)

Continet Nicol. Leonicieni librum de morbo Gallico, Jo. Almenar libell. de morb. Gall., Angeli Bolognini II. de ulcerum exteriorum medela et de unguentis; Alex. Benedicti I. de pestilenti febre et Dominici Massariae II. 3. de ponderibus et mensuris medicinalibus. (VENET?) 1532. 8. Sine loci et typographi nota. (Astruc II. 652.)

Continet Nicol. Massae, Jo. Almenar et Nic. Leonicieni II. de morbo Gallico, et Bolognini duo opuscula iam in priori collectione contenta.



*VENET.*, 1535. 8. per Jo. Patavinum et Venturinum de Ruffinellis. (Astruc II. 659.)

Sub titulo: „*Liber de morbo Gallico, in quo diversi celeberrimi in tali materia scribentes medicinae continentur auctores etc.*“ continet haec collectio libros iam dictos Leoniceni, Almenar et Bolognini, quibus accedunt Ulrici de Hutten liber de guaiaci medicina, Petri Andr. Matthioli dialogus de morbo Gallico, Laur. Phrysii epitome de cur. morb. gall., et Nic. Poll de cura morbi gall. per lign. Guaiacum.

*BASIL.*, 1536. 4. apud Jo. Bebelium. (Astruc II. 660.)

Hanc collectionem curavit, quod ex dedicatione ad Adamum Bresinium (Basil. idib. Mart. 1536.) patet, Josephus Tectander, Cracoviensis. Titulus: „*Morbi gallici curandi ratio exquisitissima a varijs ijsdemque peritissimis medicis conscripta etc.*“ Continet Matthioli, Almenar, Massae, Pollii et Bolognini opuscula cum Benedicti de Victoriis l. de morbi Gallici curandi ratione, et indice rerum generali secundum literarum seriem.

*LUGDUNI*, 1536. 8. expensis Scipionis de Gabiano et Fratrum, mense Augusto.

Repetitio collectionis Basiliensis caractere cursivo; paginis 280 et 16. Mireris in dedicatione Tectandrum de collectione Veneta loqui, cui ipse in sua (Basileensi) conficienda nil addiderit nisi Massae opus et „tractatum quem Benedictus Victorius Faventinus — nobis dictaverat.“ Eiusmodi collectio quae Matthioli, Almenaris, Pollii et Bolognini opera solum contineat, nondum nobis innotuit.

*VENET.*, 1566—67. fol. apud Jordanum Zilettum. (Astruc II. 777.)

Collectio Aloysii Luisini, medici Utinensis, vastum opus et tripartitum. Constat scilicet tomo priore, tomo posteriore et appendice tomi prioris, quae omnia plerumque unico sat spisso volumine continentur. Tomus prior habet titulum: „*De morbo Gallico omnia quae extant apud omnes medicos cuiuscunque nationis etc.*“, complectitur 8,736 et 28 paginas. Tomus posterior inscriptus est: „*De morbo Gallico tomus posterior etc.*“ Venet. 1567. paginarum 24 et 216. Tertia denique pars sub titulo: „*Appendix tomi prioris de morbo Gallico, in quo qui eidem iam antea destinati fuerant reliqui congesti sunt auctores etc.*“, paginas habet 4, 96 et 6. Seriem auctorum in hac collectione contentorum exhibet Astruc l. c.

*VENET.*, 1599. fol. apud Baretium et Socios. (Astruc. II. 846.)

Repetitio collectionis Luisiniana sub titulo: „*Aphrodisiacus sive de lue venerea in duo volumina bipar-*



*titus — opus — ab excellentissimo Al. Luisino, Utinensi, Medico celeberrimo novissime collectum.*“  
*LUGD. BATAV., 1728. fol., apud Joh. Arnold. Langerak et Joh. et Herm. Verbeek. (Astruc II. 1070.)*

Collectionis Luisiniana nova editio, quam curavit Hermann Boërhaave sub titulo: „*Aphrodisiacus sive de lue venerea in duos tomos bipartitus — opus — ab Al. Luisino novissime collectum, indice rerum omnium scitu dignarum adornatum. Editio longe emendatior et ab innumeris mendis repurgata.*“ Videtur Boërhaavius Baretii editionem secutus; novos auctores non addidit, ordinem a Luisino observatum retinuit, nisi quod appendicem tomi primi ad calcem huius tomi poneret, igitur inter primum tomum et secundum. Praefationem doctam de lue venereae natura praemisit, quae aliquoties seorsim recusa atque etiam gallice versa extat.

*LONDON, 1736. 8., printed for John Clarke. (Astruc II. 1110.)*

Chirurgus Anglus, Daniel Turner, edidit anglico idiomate epitomen ex collectione Luisini, ita ut scriptorum in ea contentorum placita ad tres locos communes redigeret, scil. ad originem morbi, ad symptomatum cognitionem et ad curam eiusdem. Inscribitur: „*Aphrodisiacus containing a summary of the ancient writers on the venereal disease etc.*“

*JENAE, 1789. fol., apud Chr. Henr. Cunonis heredes.*

Est supplementum primum Chr. Godofredi Gruneri ad collectionem Luisinianam, continens fragmenta ex 136 variis scriptoribus, notas historicas apprime doctas, glossarium vocum medico-barbararum, indicem rerum, et praefationem historicam. Operis utilissimi titulus est: „*Aphrodisiacus sive de lue venerea in duas partes divisus, quarum altera continet eius vestigia in veterum auctorum monumentis obvia, altera quos Al. Luisinus temere omisit scriptores et medicos et historicos ordine chronologico digestos etc.*“ Habet 14, 166 et 16 pagg.

*JENAE, 1793. 8., sumtibus bibliopolii academici.*

Eiusdem Gruneri supplementum alterum ad Luisini collectionem; continens 27 fragmenta, inter quae eminet Juliani Tani opus de saphati (pag. 4—232.), quod ex codice manuscripto hic primo typis excusum prodit. Accedit Gruneri opusculum: *Morbi Gallici origines Maranicae, et praefatio cum glossario, indice et notis.* Titulus: „*De morbo Gallico scriptores medici et historici partim inediti partim rari et notationibus aucti etc.*“ pag. 18, 38 et 624.



## II.

### FRACASTORII VITA.

---

**H**IERONYMUS FRACASTORIUS (*Girolamo Fracastoro*) Veronae natus anno 1483, patre Paulo Philippo, matre Camilla Mascarellia, Vicentina. Quae circumferuntur de infantia Fracastorii narrationes, labiis clausis cultri ope aperiendis eum natum fuisse, dein matrem eius cum puerulum sinu foveret fulminis ictu fuisse attonitam, his eo facilius carere lector poterit, quo minus firmo nitantur fundamento historico.

Educationis liberalioris, quae domi iam Hieronymo contigerat, continuandae causa, Patavinum petiit gymnasium, in quo tunc temporis celeberrimo et instructissimo praesertim philosophiam et mathesin, serius etiam medicinam studio amplexus est adeo singulari et felici, ut ex tironum subselliis ei mox aditus pateret ad suggestus doctorum, et id quidem anno aetatis vigesimo vix absoluto.

Bellum a Maximiliano Imperatore in Italia illis temporibus gestum ne gymnasio quidem Patavino



pepercit, quo factum est, ut Hieronymus, cui simul patris mors nuntiata erat, Veronam redire se accingeret. Sed precibus Comitis Bartholomaei Liviani (*Bartolomeo d'Alviano*), copiarum Vene-  
tarum ducis, qui armorum gloria non minus quam studiis humanioribus inclaruit, permotus academi-  
am ad Portum Naonem (*Pordunone*) adiit et doctoris munere functus ornavit. Brevi admodum temporis spatio in illa academia versatus ducem Livianum in castra secutus est usque ad cladem Aduanam (*Ghiera d'Adda*), qua facta et Liviano a Gallis capto in patriam tandem rediit Hieronymus. Veronae mox medicinam practicam fecit, mox in villa ad montem Caphium (*Monte Incaffi*) inter Athesin et lacum Benacum sita studiis variis, praesertim astronomicis et poëticis incubuit. Medicae artis et experientiae fama adeo inclaruit, ut pontifex maximus, Paulus III. munus medici in concilio Tridentino ei demandaret. Quo munere functus pestem urbi Tridentinae mox insistere praedixit, et ita effecit, ut mense Aprili 1547 concilium Tridento Bononiam migraret, quae res gratissima contigit summo pontifici.

Poësin latinam, cui Leo X., humanitatis studiorum tunc in Italia summus vindex et 'instaurator, aureum saeculum aperuerat, felicissimo eventu coluit Hieronymus, aemulatus in hoc genere Sannazarii, Naugerii, Cottae, Bembi aliorumque ex recentioribus gloriam, imitatus vero ex veteribus fere solum Virgilium.



Ita non intra Italiae fines Hieronymi fama se continuit, sed extra patriam quoque terram ad Caroli V. imperatoris Germaniae, et ad Francisci I. regis Galliae aures pervenit. Invitationem Margarithae Valesiae, ut Italia relictā apud Gallos habitaret, recusavit; Fernelium medicum consiliis adiuisse in re sat gravi et lubrica, sunt qui perhibent.

Mortuus est Hieronymus in villa sua montis Caphii, die sexta Augusti anni 1553, apoplexia correptus, superstite unico filio Paulo Philippo, reliquis tribus morte praematura iam prius defunctis. Funus Hieronymi deportatum est Veronam, ibique in aede D. Euphemiae solenni admodum ritu sepultum. Joannes Bapt. Rhamnusius (*Ramusio*, qui itinerum collectionem quam ediderat Fracastorio dedicavit) effigiem eius aeneam et illam amici Naugerii ponere curavit in fornice portae iuxta pontem St. Benedicti, quae Patavii est, addita antiquae arae pervetusta dicatione ex ruinis Salonae urbis eruta. Monumentum ipsum cum inscriptionis verbis videre licet in editione opp. Fracast. Venet. 1555. 4. Statuam marmoream civi suo decrevit grata Verona anno 1555, quam fecit sculptor Danesius Cataneus. Ex innumeris Fracastorii laudes celebrantibus poematibus (v. Jul. Caes. Scaligeri arae Fracastoreae) seligamus breve quoddam Adami Fumani Veronensis:

Longe vir unus omnium doctissimus,  
Verona per quem non Marones Mantuae  
Nec nostra priſcis invident iam saecula,



Virtute summam consecutus gloriam  
Iam grandis aevo hic conditur Frastorius.  
Ad tristem acerbae mortis eius nuntium  
Vicina flevit ora, flerunt ultimae  
Gentes perisse musicorum candidum  
Florem, optimarum et lumen artium omnium.

Nummos binos in honorem Fracastorii percussos memorat Car. Asm. Rudolphi (*Index numismatum in virorum de rebus medicis vel physicis meritorum memoriam percussorum*, Berol. 1825. 8. pag. 36.); alter habet Fracastorii effigiem et in averso aram accensam cum serpente, libro aperto, sphaera, chelyde et laurea; accedit inscriptio: *Minervae, Apollini et Aesculapio sacrum*; alter nummus habet effigiem Catulli, Maphei et Fracastorii cum inscripto anno 1805, in averso Minervam, prope quam Historia sedet iuveni lauream porrigens, cum inscriptione: *Sertum colenti*.

Vitam Fracastorii narravit auctor anonymus (forsan *Rhamnusius*) in editionibus operum Juntinis; *Franc. Pola* in Chioccii opere de collegii Veronensis medicis et philosophis; *Frid. Otto Mencken*, tam elegantis medici minime dignus biographus, in proprio et diffusissimo opere, quod prodiit Lipsiae, 1731. 4. sub titulo: „*De vita, moribus, scriptis, meritisque in omne literarum genus prorsus singularibus H. Fracastorii*.“ Cfr. quoque inter multos alios Fracastorii laudatores *William Roscoe* in vitae Leonis X. volumine tertio, et *P. A. Budik* *Leben und Wirken der vorzüglichsten lateinischen Dichter des XV. bis XVIII.*



Jahrhunderts. Wien, 1827. 8. (Vol. I—III.), volumen secundum.

Scripta Fracastorii sunt vel prosa oratione, ut:

Homocentrica sive de stellis liber unus.

De causis criticorum dierum libellus.

De sympathia et antipathia liber unus.

De vini temperatura sententia.

Naugerius sive de poëtica dialogus.

Turrius sive de intellectione dialogus.

Fracastorius sive de anima dialogus.

vel poëtico et ligato sermone, ut:

Syphilis sive morbus Gallicus.

Joseph. (non absolutum.)

Alcon sive de cura canum venaticorum.

Carmina varia.

Prodierunt horum operum collectorum editiones satis numerosae:

*Venet.*, 1555. 4., *apud Juntas*. (curavit Paul. Rhamnusius) recusa *ibid.* 1574. 4., *ibid.* 1584. 4.

*Lugd.*, 1591. 8. *apud Franc. Fabrum*. (duobus tomis constans nitida editio, cui carmen Alcon inest, prioribus editionibus nondum additum).

*Montispelessuli*, 1622. 8. (duobus tomis constans).

*Genevae*, 1621. 8. *apud Sam. Crispinum*. *Ibid.* 1637. 8. *ap. Jac. Stoer*; *ibid.* 1671. 8. *ap. Sam. Chouet*; 1691. 8. et pluries.

Praestantissimum vero opus Fracastorii, quo famam perennem sibi apud omnes artium liberalium cultores acquisivit, est carmen, quod inscribitur *Syphilis*, Petro Bembo dedicatum. Ex versiculis I. 15, 16. discimus, hoc ipsum carmen iam ante annum 1521 fuisse absolutum, quo anno scilicet Leo X. Pont. Max. diem obiit supremum. Attamen ante annum 1530 editio impressa hucusque nulla innotuit. Prodierunt autem carminis Fracastoriani de morbo Gallico plures editiones et versiones:



EDITIONES.

VERONAE, 1530. 4. mense Augusto.

Editio rarissima, forsitan princeps. Vide Jo. Benj. Böhm-  
meri biblioth. med. philos. (Lips. 1755.) n. 3805, ubi  
forma 8. mai. ei tribuitur, et Ebert bibl. Lexik. n. 7851.

ROMAE, 1531. 4., apud Anton. Bladum Asulanum, mense  
Septembri.

Editionem hactenus nullibi commemoratam ipse pos-  
sideo. Charact. literar. cursivus, 24 lin., folia 31 cum  
sign. et cust., sine numeris folior. et versuum. Folium  
31 habet Emendanda.

PARIS., 1531. 8. apud Ludovicum Cyaneum.

Menckenio dicta editio, notitiae fonte non indicato.

BASIL., 1536. 8. apud Bebelium.

Char. lit. cursivus, 26 lin., folia 28 cum sign. et cust.,  
sine numeris foliorum et versuum.

PARIS., 1539. 16., apud Foucherium.

LUGD., 1547. 12., apud Jo. Frellonium.

ANTWERP., 1562. 8. apud. Martin. Nutium.

LONDINI, 1720. 4., ibid. 1746. 4.

VERSIONES ITALICAE.

NAPOLI, 1731. 8., presso il Parrino.

Vertit Pietro Belli, Nobilis Leccensis, in versus ita-  
licos non malos, qui redeunt in *Raccolta di poëmetti*  
*didascalici*, Tomo III., Milano, 1822. 8. Exhibet  
haec editio Neapolitana ipsum Fracastorii carmen la-  
tinum pag. 59—104.

BOLOGNA, 1738. 4.

Vertit Sebastiano degli Antoni, Vicentinus, medicus  
(† 1750). Defendit suam versionem contra aemulos et  
obtrectatores in *Risposta ad una lettera critica d'au-*  
*tore anonimo sopra il di lui volgarizzamento della*  
*sifilide*. Vicenza, 1740. 4.

VERONA, 1739. 4., appresso Dionigi Ramanzini.

Vertit Antonio Tirabosco.

PADOVA, 1739. 4., presso Gius. Comino.

Vertit Vincenzo Benini, Coloniensis, medicus, qui  
etiam notas quasdam in Celsi libros exhibuit, additas  
editionibus Celsi Patav., 1750. et Venet., 1763. Versio  
Syphilidis paucis tantum exemplis seorsim impressis  
extat, reliquis omnibus collectioni poëmatum variorum  
insertis, quae Patav. 1739. eodem typographeo prodiit.  
(Ebert bibl. Lex. n. 7850).

BOLOGNA, 1765. 8. per Lelio della Volpe.

Nitida editio eiusdem versionis a Beninio factae, cum  
Fracastorii effigie. Accedunt textus latinus ex adverso  
appositus, prolegomena et notae.

CREMONA, 1821. 4.



Vertit *Giovanni Luigi Zaccarelli*. — Aliam antiquiorem adhuc perhibent versionem italicam ab *Ercole Cato*, Jurisconsulto, versus finem saeculi XVI. confectam forsitan nunquam impressam.

#### VERSIONES GALLICAE.

*PARIS.*, 1753. 8., chez Jacques Franç. Quillau, imprimerie de Jean Lamesle.

Verterunt *Macquer* et *Jacq. Lacombe*, medicae artis ignari. Versionem pedestri sermone et parum poëticam dederunt, textum latinum ex adverso, notulas quasdam in calce libri addiderunt. — Non certo constat de versione, quam *Petrus Laetus* seu *Pierre Joyeuse* (+1599) confecisse dicitur lingua Gallica.

Ceterum legitur textus latinus carminis de morbo Gallico in omnibus *Fracastorii operum Editionibus*, quas diximus; deinde in *Collectionibus carminum Fracastorii et coaevorum*, quae collectiones prodierunt Patavii 1718. 8. et 1739. 4., Veronae 1740 et 1747. 12., Venet. 1759. 12. etc.; in collectione carminum, quam edidit *Janus Gruterus* sub titulo *Deliciae CC. Italorum poëtarum collectore Ranutio Ghero*, Francof. 1608. 12. T. I. pag. 1045 sq.; in *Carminibus illustrium poëtarum Italorum*, Flor. 1719 sq. 8. Tom. V. p. 1 sq.; denique in *Collectione Luisiniana* de morbo Gallico, Venet. 1566. Tom. I., p. 161 sq., Lugd. Batav. 1728. p. 183 sq.

De Syphilide *Fracastorii* cfr. *Andreae Chiocci Veronensis* apologia pro divina Hier. *Fracastorii* Syphilide adversus *Jul. Caes. Scaligeri* censuram. Veronae 1598. 4., in quo libro defenditur *Fracastorius* adversus *Scaligerum*, qui carmen quidem eximie laudaverat, sed cuius vituperatio locorum quorundam concivi poëtae displicuerat.

---

**HIERONYMI FRACASTORII**  
**S Y P H I L I S**  
**SIVE**  
**MORBUS GALLICUS.**

---

***LIBRI TRES.***



THE UNIVERSITY OF CHICAGO

5 Y P H L 1 S

MORRIS GALLIES

LIBRARY



## LIBER PRIMUS.

---

QUI casus rerum varii, quae semina morbum  
Insuetum nec longa ulli per saecula visum  
Attulerint, nostra qui tempestate per omnem  
Europam, partimque Asiae, Libyaeque per urbes  
5 Saeviit, in Latium vero per tristia bella  
Gallorum irrupit, nomenque a gente recepit,  
Nec non et quae cura, et opis quid comperit usus,  
Magnaue in angustis hominum solertia rebus,  
Et monstrata Deum auxilia et data munera coeli  
10 Hinc canere, et longe secretas quaerere causas  
Aëra per liquidum et vasti per sidera Olympi  
Incipiam: dulci quando novitatis amore  
Correptum placidi naturae suavibus horti  
Floribus invitant et amantes mira Camoenae.  
15 BEMBE, decus clarum Ausoniae, si forte vacare  
Consultis LEO te a magnis paulisper et alta  
Rerum mole sinit, totum qua sustinet orbem,  
Et iuvat ad dulces paulum secedere Musas:  
Ne nostros contemne orsus medicumque laborem,  
20 Quidquid id est. Deus haec quondam dignatus Apollo est



Et parvis quoque rebus inest sua saepe voluptas,  
Scilicet hac tenui rerum sub imagine multum  
Naturae fatigue subest et grandis origo.

Tu mihi, quae rerum causas, quae sidera noscisc  
25 Et coeli effectus varios atque aëris oras,  
Uranie (sic dum puro spatiaris Olympo  
Metirisque vagi lucentes aetheris ignes,  
Concentu tibi divino cita sidera plaudant)  
Ipsa ades, et mecum placidas Dea lude per umbras,  
30 Dum tenues aerae, dum myrtea silva canenti  
Aspirat resonatque cavis Benacus ab antris.  
Dic Dea quae causae nobis post saecula tanta  
Insolitam peperere luem? num tempore ab illo  
Vecta mari occiduo nostrum pervenit in orbem,  
35 Ex quo lecta manus solvens de littore Ibero  
Ausa fretum tentare vagique incognita ponti est  
Aequora, et orbe alio positas perquirere terras?  
Illic nanque ferunt aeterna labe per omnes  
Id morbi regnare urbes, passimque vagari  
40 Perpetuo coeli vitio, atque ignoscere paucis.  
Commercine igitur causa accessisse putandum est  
Delatam contagem ad nos, quae parva sub ipsis  
Principiis mox et vires et pabula sensim  
Suscipiens sese in terras diffuderit omnes?  
45 Ut saepe in stipulas cecidit cum forte favilla  
De face, neglectam pastor quam liquit in arvo,  
Illa quidem tenuis primum similisque moranti  
Incedit, mox, ut paulatim increvit eundo,  
Tollitur et victrix messem populatur et agros  
50 Vicinumque nemus, flammisque sub aethera iactat.



Dat sonitum longe crepitans Iovis avia silva  
Et coelum late circum campique relucent.

At vero, si rite fidem observata merentur,  
Non ita censendum: nec certe credere par est  
55 Esse peregrinam nobis transque aequora vectam  
Contagem, quoniam in primis ostendere multos  
Possumus, attactu qui nullius hanc tamen ipsam  
Sponte sua sensere luem, primique tulere.

Praeterea et tantum terrarum tempore parvo  
60 Contages non una simul potuisset obire.  
Aspice per Latii populos, quique herbida Sagrae  
Pascua et Ausonios saltus et Iapygis orae  
Arva colunt, spectata Tiberis qua labitur, et qua  
Eridanus centum fluviis comitatus in aequor

65 Centum urbes rigat et placidis interfluit undis:  
Uno nonne vides ut tempore pestis in omnes  
Saeviit, ut sortem pariter transegimus unam?  
Quin etiam externos eadem per tempora primum  
Excepisse ferunt, nec eam cognovit Ibera

70 Gens prius, ignotum quae scindere puppibus aequor  
Ausa fuit, quam quos disternat alta Pyrene,  
Atque freta atque Alpes cingunt Rhenusque bicornis,  
Quam reliqui, quos lata tenet gelida ora sub Arcto.  
Tempore non alio Poeni sensistis et omnes,

75 Qui laetam Aegyptum metitis foecundaque Nilo  
Arva et palmiferae silvas tondetis Idumes.  
Quae quum sic habeant sese, nempe altius isti  
Principium labi rerumque latentior ordo,  
Ni fallor, graviorque subest et maior origo.

80 Principio quaeque in terris quaeque aethere in alto



- Atque mari in magno Natura educit in auras,  
Cuncta quidem nec sorte una nec legibus iisdem  
Proveniunt, sed enim, quorum primordia constant  
E paucis, crebro ac passim pars magna creantur:  
85 Rarius ast alia apparent, et non nisi certis  
Temporibusve locisve, quibus violentior ortus  
Et longe sita principia: ac nonnulla, prius quam  
Erumpant tenebris et opaco carcere noctis,  
Mille trahunt annos, spatiosaque saecula poscunt,  
90 Tanta vi coëunt genitalia semina in unum.  
Ergo et morborum, quoniam non omnibus una  
Nascendi est ratio, facilis pars maxima visu est  
Et faciles ortus habet et primordia praesto.  
Rarius emergunt alii, et post tempore longo  
95 Difficiles causas et inextricabile fatum  
Et sero potuere altas superare tenebras.  
Sic Elephas sacer Ausoniis incognitus oris,  
Sic Lichen latuere diu, quibus accola Nili  
Gens tantum regioque omnis vicina laborat.  
100 De genere hoc est dira lues, quae nuper in auras  
Exiit et tandem sese caligine ab atra  
Exemit, durosque ortus et vincula rupit.  
Quam tamen, aeternum quoniam dilabitur aevum,  
Non semel in terris visam sed saepe fuisse  
105 Ducendum est, quanquam nobis nec nomine nota  
Hactenus illa fuit, quoniam longaeva vetustas  
Cuncta situ involvens et res et nomina delet,  
Nec monumenta patrum seri videre nepotes.  
Oceano tamen in magno sub sole cadente,  
110 Qua misera inventum nuper gens incolit orbem,



- Passim oritur nullisque locis non cognita vulgo est.  
Usque adeo rerum causae atque exordia prima  
Et coelo variare et longo tempore possunt.  
Quodque illic fert sponte aër et idonea tellus,  
115 Huc tandem annorum nobis longa attulit aetas.  
Cuius forte suo si cunctas ordine causas  
Nosse cupis, magni primum circumspecte mundi  
Quantum hoc infecit vitium, quot adiverit urbes.  
Quumque animadvertas tam vastae semina labis  
120 Esse nec in terrae gremio nec in aequore posse,  
Haud dubie tecum statuas reputesque necesse est,  
Principium sedemque mali consistere in ipso  
Aëre, qui terras circum diffunditur omnes,  
Qui nobis sese insinuat per corpora ubique  
125 Suetus et has generi viventum immittere pestes.  
Aër quippe pater rerum est et originis auctor.  
Idem saepe graves morbos mortalibus affert,  
Multimode natus tabescere corpore molli,  
Et facile affectus capere atque inferre receptos.  
130 Nunc vero, quonam ille modo contagia traxit,  
Accipe, quid mutare queant labentia saecula.  
In primis tum sol rutilus, tum sidera cuncta  
Tellurem liquidasque auras atque aequora ponti  
Immutant agitantque, utque ipso sidera coelo  
135 Mutavere vicem et sedes liquere priores:  
Sic elementa modis variis se grandia vertunt.  
Aspice ut, hibernus rapidos ubi flexit in Austrum  
Phoebus equos nostrumque videt depressior orbem,  
Bruma riget duratque gelu spargitque pruina  
140 Tellurem, et gelida glacie vaga flumina sistit.



- Idem, ubi nos Cancro propior spectavit ab alto,  
Urit agros, arent nemora et sitientia prata,  
Siccaque pulvereis aestas squallescit in arvis.  
Nec dubium, quin et noctis nitor, aurea Luna,  
145 Cui maria alta, omnis cui rerum obtemperat humor,  
Quin et Saturni grave sidus, et aequior orbi  
Stella Iovis, quin pulchra Venusque, et Martius ignis,  
Ac reliqua astra etiam mutent elementa trahantque  
Perpetuum, et late magnos dent undique motus.  
150 Praecipue sedem si quando plurima in unam  
Convenere, suo vel multum devia cursu  
Longe alias tenuere vias: haec scilicet annis  
Pluribus et rapidi post multa volumina coeli  
Eveniunt, Diis fata modis volventibus istis.  
155 Ut vero evenisse datum est, numerumque diesque  
Exegere suos praefixaque tempora fatis,  
Proh quanta aërios tractus, salsa aequora quanta,  
Telluremque manent! alibi quippe omnia late  
Cogentur spatia in nubes, coelum imbribus omne  
160 Solvetur, summisque voluti montibus amnes  
Praecipites secum silvas secum aspera saxa  
Secum armenta trahent, medius pater impete magno  
Aut Padus aut Ganges super et nemora alta domosque  
Turbidus aequabit pelago freta lata sonante.  
165 Aestates alibi magnae condentur, et ipsae  
Flumina speluncis flebunt arentia Nymphae.  
Aut venti cuncta invertent, aut obice clausi  
Excutient tellurem imam et cum turribus urbes.  
Forsitan et tempus veniet, poscentibus olim  
170 Natura fatisque Deum, quum non modo tellus



Nunc culta aut obducta mari aut deserta iacebit,  
Verum etiam sol ipse novum (quis credere possit?)  
Curret iter, sua nec per tempora diffluet annus:  
Ast insueti aestus insuetaque frigora mundo

175 Insurgent, et certa dies animalia terris  
Monstrabit nova, nascentur pecudesque feraeque  
Sponte sua, primaque animas ab origine sument.  
Forsitan et maiora audens producere tellus  
Coeumque Enceladumque feret magnumque Typhoëa,

180 Ausuros patrio Superos detrudere coelo,  
Convulsumque Ossan nemoroso imponere Olympo.  
Quae quum perspicias, nihil est, cur tempore certo  
Admirere novis magnum marcescere morbis  
Aëra, contagesque novas viventibus aegris

185 Sidere sub certo fieri et per saecula longa.

Bis centum fluxere anni, quum flammea Marte  
Lumina Saturno tristi immiscente per omnes  
Aurorae populos, per quae rigat aequora Ganges,  
Insolita exarsit febris, quae pectore anhelo

190 Sanguineum sputum exagitans (miserabile visu)  
Quarta luce frequens fato perdebat acerbo.  
Illa eadem Assyriae gentes et Persidos et quae  
Euphratem Tigrimque bibunt post tempore parvo  
Corripuit, ditesque Arabas mollemque Canopum,

195 Inde Phrygas, inde et miserum trans aequora vecta  
Infecit Latium atque Europa saeviit omni.

Ergo age, iam mecum semper sese aethera circum  
Volventem Superumque domos ardentiaque astra  
Contemplare, animumque agitans per cuncta require,  
200 Quis status illorum fuerit, quae signa dedere



- Sidera, quid nostris coelum portenderit annis:  
Hinc etenim tibi forte novae contagis origo  
Omnis et eventus tanti via prima patescet.  
Aspice candentes magni qua Cancer Olympi  
205 Excubat ante fores et brachia pandit aperta:  
Hinc dirae facies, hinc se diversa malorum  
Ostendent portenta: una hac sub parte videbis  
Magna coisse simul radiis ardentibus astra  
Et coniuratas sparsisse per aëra flammās.  
210 Flammās, quas longe tumulo Sirenis ab alto  
Prospiciens senior Vates, quem dia per omnes  
Coelicolūmque domos duxit docuitque futura  
Uranie: miseras, inquit, defendite terras,  
O Superi, insolitam video per inania ferri  
215 Illuviem et magnos coeli tabescere tractus,  
Bella etiam Europae miserae, bella impia, et agros  
Ausoniae passim currentes sanguine cerno.  
Dixit, et illa etiam scriptis ventura notavit.  
Mos Superūm est, ubi saecula vagus sol certa peregit,  
220 Ab Iove decerni fata et cuncta ordine pandi,  
Quaecunque eventura manent terrasque polumque.  
Quod tempus quum iam nostris venientibus annis  
Instaret, rerum summus sator et Superūm rex  
Iupiter acciri socios in rebus agendis  
225 Saturnum Martemque iubet: bipatentia Cancer  
Limina portarum reserat Diisque atria pandit.  
Conveniunt, quibus est fatorum cura gerenda:  
Impiger ante alios flammis ferroque coruscans  
Bellipotens Mavors, animis cui praelia et arma  
230 Vindictaeque manent et ovantes sanguine caedes.



- Post placidus curru invectus rex Iupiter aureo  
Insequitur, ni fata obstant, pater omnibus aequus.  
Postremus longaue via tardatus et annis  
Falcifer accedit senior, qui haud immemor irae  
235 In natum veteris nato et parere recusans  
Saepe etiam cessit retro et vestigia torsit,  
Multa minans multumque animo indignatus iniquo.  
Iupiter at solio ex alto, quo se solet uno  
Tollere, percenset fata et ventura resolvit,  
240 Multum infelicis miserans incommoda terrae,  
Bellaque fortunasque virum, casuraque rerum  
Imperia, et praedas, adapertaque limina morti:  
In primis ignota novi contagia morbi,  
Morbi, qui humanae nulla mansuescat opis vi.  
245 Assensere Dei reliqui: concussus Olympus  
Intremuit tactusque novis defluxibus aether.  
Paulatim aërii tractus et inania lata  
Accepere luem, vacuasque insuetus in auras  
Marcor iit coelumque tulit contagia in omne.  
250 Sive quod ardenti tot concurrentibus astris  
Cum sole e pelago multos terraue vapores  
Traxerit ignea vis, qui misti tenuibus auris  
Correptique novo vitio contagia visu  
Perrara attulerint: aliud sive aethere ab alto  
255 Demissum late aërias corruperit oras.  
Quanquam animi haud fallor, quid agat quove ordine  
Dicere et in cunctis certas perquirere causas, [coelum  
Difficile esse: adeo interdum per tempora longa  
Effectus trahit, interdum (quod fallere possit)  
260 Miscentur fors et varii per singula casus.



- Nunc age, non id te lateat, super omnia miram  
Naturam et longe variam contagibus esse.  
Solis nam saepe arboribus fit noxius aër,  
Et tenerum germen florumque infecit honorem,  
265 Interdum segetem et sata laeta annique labores  
Corripuit, scabraque ussit rubigine culmos,  
Et vitiata parens produxit semina tellus.  
Interdum poenas animalia sola dedere,  
Aut multa, aut certa ex ipsis. Memini ipse malignam  
270 Luxuriam vidisse anni, multoque madentem  
Autumnum perflatum Austro, quo protinus omne  
Caprigenum pecus e cunctis animantibus unum  
Corruit: a stabulis laetas ad pabula pastor  
Ducebat, tum forte, alta securus in umbra  
275 Dum caneret tenuique gregem mulceret avena,  
Ecce aliquam tussis subito irrequieta tenebat,  
Nec longe mora mortis erat: nanque acta repente  
Circum praecipiti lapsu revomensque supremam  
Ore animam socias inter moribunda cadebat.  
280 Vere autem (dictu mirum!) atque aestate sequenti  
Infirmas pecudes balantumque horrida vulgus  
Pestis febre mala miserum paene abstulit omne.  
Usque adeo varia affecti sunt semina coeli,  
Et variae rerum species, numerusque vicissim  
285 Inter mota subest interque moventia certus.  
Nonne vides, quamvis oculi sint pectore anhelos  
Expositi mollesque magis, non attamen ipsos  
Carpere tabem oculos, sed sese immergere in imum  
Pulmonem? et pomis quanquam sit mollior uva,  
290 Non tamen iis vitiatur, at ipsa livet ab uva.



Nempe alibi vires alibi sua pabula desunt,  
Ast alibi mora certa, nec ipsa foramina multum  
Non faciunt, hinc densa nimis nimis inde soluta.

Ergo contagum quoniam natura genusque  
295 Tam varium est, et multa modis sunt semina miris,  
Contemplator et hanc, cuius coelestis origo est,  
Quae sicut desueta ita mira erupit in auras.  
Illa quidem non muta maris turbamque natantum,  
Non volucres, non bruta altis errantia silvis,  
300 Non armenta boum pecudesve armentave equorum  
Infecit, sed mente vicens ex omnibus unum  
Humanum genus, et nostros est pasta sub artus.  
Porro homine e toto, quod in ipso sanguine crassum  
Et sordens lentore foret foedissima primum

305 Corripuit sese pascens uligine pingui.  
Tali se morbus ratione et sanguis habebant.

Nunc ego te affectus omnes et signa docebo  
Contagis miserae: atque utinam concedere tantum  
Musa queat tantumque velit defendere Apollo,  
310 Tempora qui longa evoluit, cui carmina curae,  
Haec multas monumenta dies ut nostra supersint.  
Forte etenim nostros olim legisse nepotes  
Et signa et faciem pestis novisse iuvabit.  
Nanque iterum, quum fata dabunt labentibus annis,  
315 Tempus erit, quum nocte atra sopita iacebit  
Interitu data: mox iterum post saecula longa  
Illa eadem exsurget coelumque aurasque reviset,  
Atque iterum ventura illam mirabitur aetas.

In primis mirum illud erat, quod labe recepta  
320 Saepe tamen quater ipsa suum compleverat orbem



- Luna prius, quam signa satis manifesta darentur.  
Scilicet extemplo non sese prodit aperte,  
Ut semel est excepta intus, sed tempore certo  
Delitet et sensim vires per pabula captat.
- 325 Interea tamen insolito torpore gravati,  
Sponteque languentes animis et munera obibant  
Aegrius et toto segnes se corpore agebant.  
Ille etiam suus ex oculis vigor et suus ore  
Deiectus color haud laeta de fronte cadebat.
- 330 Paulatim caries foedis enata pudendis  
Hinc atque hinc invicta locos aut inguen edebat.  
Tum manifesta magis vitii se prodere signa.  
Nam, simul ac purae fugiens lux alma diei  
Cesserat et noctis tristes induxerat umbras,
- 335 Innatusque calor noctu petere intima suetus  
Liquerat extremum corpus, nec membra fovebat  
Obsita mole pigra humorum, tum vellier artus  
Brachiaque scapulaeque gravi suraeque dolore.  
Quippe, ubi per cunctas ierant contagia venas,
- 340 Humoresque ipsos et nutrimenta futura  
Polluerant, natura malum secernere sueta  
Infectam partem pellebat corpore ab omni  
Exterius: verum crasso quia corpore tarda  
Haec erat et lentore tenax, multa inter eundum
- 345 Haerebat membris exsanguibus atque lacertis,  
Inde graves dabat articulis extenta dolores.  
Parte tamen leviori magisque erumpere nata,  
Summa cutis pulsa et membrorum extrema petebat,  
Protinus informes totum per corpus achores
- 350 Rumpebant, faciemque horrendam et pectora foede



Turpabant, species morbi nova: pustula summae  
Glandis ad effigiem et pituita marcida pingui,  
Tempore quae multo non post adaperta dehiscens  
Mucosa multum sanie taboque fluebat.

355 Quin etiam erodens alte et se funditus abdens  
Corpora pascebat misere, nam saepius ipsi  
Carne sua exutos artus squallentiaque ossa  
Vidimus, et foedo rosa ora dehiscere hiatu,  
Ora atque exiles reddentia guttura voces.

360 Ut saepe aut cerasis aut Phyllidis arbore tristi  
Vidisti pinguem ex udis manare liquorem  
Corticibus, mox in lentum durescere gummi,  
Haud secus hac sub labe solet per corpora mucor  
Diffluere, hinc demum in turpem concreescere callum.

365 Unde aliquis ver aetatis pulchramque iuventam  
Spirans et membra oculis deformia torvis  
Prospiciens foedosque artus turgentiaque ora,  
Saepe Deos saepe astra miser crudelia dixit.  
Interea dulces somnos noctisque soporem

370 Omnia per terras animalia fessa trahebant,  
Illis nulla quies aderat, sopor omnis in auras  
Fugerat, iis oriens ingrata Aurora rubebat,  
Iis inimica dies inimicaque noctis imago.  
Nulla Ceres illos, Bachi non ulla iuvabant

375 Munera, non dulces epulae, non copia rerum,  
Non urbis, non ruris opes, non ulla voluptas,  
Quamvis saepe amnes nitidos iucundaque Tempe  
Et placidas summis quaesissent montibus auras.  
Diis etiam sparsaeque preces incensaque templis

380 Thura et divitibus decorata altaria donis:



Dii nullas audire preces donisve moveri.

- Ipse ego Cenomanum memini qua pingua dives  
Pascua Sebina praeterfluit Ollius unda  
Vidisse insignem Iuvenem, quo clarior alter  
385 Non fuit, Ausonia nec fortunatior omni:  
Vix pubescentis florebat vere iuventae,  
Divitiis proavisque potens et corpore pulchro,  
Cui studia aut pernicious equi compescere cursum,  
Aut galeam induere, et pictis splendere in armis,  
390 Aut iuvenile gravi corpus durare palaestra,  
Venatuque feras agere et praevertere cervos.  
Illum omnes Ollice Deae Eridanique puellae  
Optarunt, nemorumque Deae rurisque puellae,  
Omnes optatos suspiravere hymenaeos.  
395 Forsan et ultores Superos neglecta vocavit  
Non nequicquam aliqua et votis pia Numina movit,  
Nam nimium fidentem animis nec tanta timentem  
Invasit miserum labes, qua saevior usquam  
Nulla fuit, nulla unquam aliis spectabitur annis.  
400 Paulatim ver id nitidum, flos ille iuventae  
Disperiit, vis illa animi: tum squallida tabes  
Artus (horrendum) miseros obduxit, et alte  
Grandia turgebant foedis abscessibus ossa.  
Ulcera (proh Divum pietatem) informia pulchros  
405 Pascebant oculos et diae lucis amorem,  
Pascebantque acri corrosas vulnere nares.  
Quo tandem infelix fato, post tempore parvo  
Aetheris invisas auras, lucemque reliquit.  
Illum Alpes vicinae, illum vaga flumina flerunt:  
410 Illum omnes Ollice Deae Eridanique puellae



Fleverunt, nemorumque Deae rurisque puellae,  
Sebinusque alto gemitum lacus edidit amne.

Ergo hanc per miseras terras Saturnus agebat  
Pestem atrox, nec saeva minus crudelis et ipse  
415 Miscebat Mavors coniunctaque fata ferebat.

Quippe lue hac nascente, putem simul omnia diras  
Eumenidas cecinisse fera et crudelia nobis,  
Tartareos etiam barathro dira omina ab imo  
Excivisse lacus, Stygiaque ab sede laborem,

420 Pestemque horribilemque famem bellumque necemque.  
Dii patrii, quorum Ausonia est sub numine, tuque  
Tu Latii, Saturne, pater, quid gens tua tantum  
Est merita? an quicquam superest dirique gravisque,  
Quod sit inexhaustum nobis? ecquod genus usquam

425 Aversum usque adeo coelum tulit? ipsa labores  
Parthenope dic prima tuos, dic funera regum  
Et spolia et praedas, captivaeque colla tuorum.

An stragem infandam memorem, sparsumque cruorem  
Gallorumque Italumque pari discrimine, quum iam  
430 Sanguineum, et defuncta virum defunctaque equorum  
Corpora volventem, cristasque atque arma trahentem  
Eridanus pater acciperet rapido agmine Tarrum?

Te quoque spumantem et nostrorum caede tumentem,  
Abdua, non multo post tempore, te pater idem

435 Eridanus gremio infelix suscepit, et altum  
Indoluit tecum, et fluvio solatus amico est.

Ausonia infelix, en quo discordia priscam  
Virtutem et mundi imperium perduxit avitum!

Angulus anne tui est aliquis, qui barbara non sit  
440 Servitia et praedas et tristia funera passus?



Dicite vos nullos soliti sentire tumultus  
Vitiferi colles, qua flumine pulcher amoenus  
Erethenus fluit et, plenis lapsurus in aequor  
Cornibus, Euganeis properat se iungere lymphis.

445 O patria, o longum felix longumque quieta  
Ante alias patria, o Divum sanctissima tellus,  
Dives opum, foecunda viris, laetissima campis  
Uberibus, rapidoque Athesi et Benacide lymphas,  
Aerumnas memorare tuas, summamque malorum

450 Quis queat et dietis nostros aequare dolores  
Et turpes ignominias et barbara iussa?  
Abde caput Benace tuo et te conde sub amne,  
Victrices nec iam Deus interlabere lauros.

En etiam ceu nos agerent crudelia nulla  
455 Nec lacrimae planctusve forent, en dura tot inter  
Spes Latii spes et studiorum et Palladis illa  
Occidit: ereptum Musarum e dulcibus ulnis

Te miserum ante diem crudeli funere, *Marce*  
*Antoni*, aetatis primo sub flore cadentem

460 Vidimus extrema positum Benacide ripa,  
Quam media inter saxa sonans Sarca abluit unda.

Te ripae flevere Athesis, te voce vocare  
Auditae per noctem umbrae manesque Catulli,  
Et patrios mulcere nova dulcedine lucos.

465 Tempestate illa Ausoniam rex Gallus opimam  
Vertebat bello et Ligurem ditione premebat,  
Parte alia Caesar ferro superabat et igni  
Euganeos placidumque Silim Carnumque rebellem:  
Et totum luctus Latium moerorque tenebat.



## LIBER SECUNDUS.

---

- Nunc age, quae vitae ratio quae cura adhibenda  
Perniciem adversus tantam, quid tempore quoque  
Conveniat, nostri quae pars est altera coepti,  
Expediam et miranda hominum comperta docebo.
- 5 Quippe nova quum re attoniti multa irrita primum  
Tentassent, tamen angustis solertia maior  
In rebus crescensque usu experientia longo  
Evicere, datumque homini protendere longe  
Auxilia et certis pestem compescere vinclis,
- 10 Victorem et sese claras attollere in auras.  
Credo equidem et quaedam nobis divinitus esse  
Inventa, ignaros fati ducentibus ipsis.  
Nam, quanquam fera tempestas et iniqua fuerunt  
Sidera, non tamen omnino praesentia Divum
- 15 Abfuit a nobis placidi et clementia coeli.  
Si morbum insolitum si dura et tristia bella  
Vidimus et sparsos dominorum caede Penates,  
Oppidaque, incensasque urbes subversaue regna  
Et templa et raptis temerata altaria sacris,
- 20 Flumina deiectas si perrumpentia ripas



- Evertere sata et mediis nemora eruta in undis  
Et pecora et domini correptaque rura natarunt,  
Obseditque inimica ipsas penuria terras:  
Haec eadem tamen, haec aetas (quod fata negarunt  
25 Antiquis) totum potuit sulcare carinis  
Id pelagi, immensum quod circuit Amphitrite.  
Nec visum satis, extremo ex Atlante repostos  
Hesperidum penetrare sinus, Prassumque sub Arcio  
Inspectare alia praeruptaque littora Rhapti,  
30 Atque Arabo advehere et Carmano ex aequore merces:  
Aurorae sed itum in populos Titanidis usque est  
Supra Indum Gangemque supra, qua terminus olim  
Catygare noti orbis erat, superata Cyambe  
Et dites ebena et felices macere silvae.  
35 Denique et a nostro diversum gentibus orbem  
Diversum coelo et clarum maioribus astris  
Remigio audaci attigimus ducentibus et Diis.  
Vidimus et Vatem egregium, cui pulchra canenti  
Parthenope placidusque cavo Sebethus ab antro  
40 Plauserunt umbraeque sacri manesque Maronis,  
Qui magnos stellarum orbes cantavit et hortos  
Hesperidum coelique omnes variabilis oras.  
Te vero ut taceam atque alios quos fama futura  
Post mutos cineres quos et venientia saecula  
45 Antiquis conferre volent, at, BEMBE, tacendus  
Inter dona Deum nobis data non erit unquam  
Magnanimus LEO, quo Latium quo maxima Roma  
Attollit caput alta, paterque ex aggere Tibris  
Assurgit Romaeque fremens gratatur ovanti.  
50 Cuius ab auspiciis iam nunc mala sidera mundo



Cessere, et laeto regnat iam Iupiter orbe,  
Puraque pacatum diffundit lumina coelum:  
Unus, qui aerumnas post tot longosque labores  
Dulcia iam profugas revocavit ad otia Musas,  
55 Et leges Latio antiquas rectumque piumque  
Restituit: qui iusta animo iam concipit arma  
Pro re Romana pro relligione Deorum,  
Unde etiam Euphrates etiam late ostia Nili  
Et tantum Euxini nomen tremit unda refusi,  
60 Atque Aegaea suos confugit Doris in Isthmos.

Ergo, alii dum tanta canent dumque illius acta  
Incluta component, dum forte accingeris et tu  
Condere et aeternis victurum intexere chartis:  
Nos, quos fata vocant haud tanta ad munera, lusus  
65 Inceptos quantum tenuis fert Musa sequamur.

Principio quoniam affecti non sanguinis una  
Est ratio, tibi sit morbo spes maior in illo,  
Sanguine qui insedit puro: verum, quibus atra  
Bile tument spissoque resultant sanguine venae,  
70 Maior in iis labor est pestisque tenacius haeret.  
Quare operae pretium est validis atque acribus uti  
Omnibus hos contra, miseris nec parcere membris.  
Quin etiam meliora sibi promittere cuncta  
Ille potest, qui principiis novisse sub ipsis  
75 Serpentem tacite valuit per viscera labem.

Nanque, ubi pasta diu vires per pabula longa  
Auxerit et iam se vitium firmaverit intra,  
Heu quanto tibi libertas speranda labore est!  
Ergo omnem impendes operam te opponere parvis  
80 Principiis, memorique animo haec praecepta reconde.



- In primis ego non omni te assuescere coelo  
Exhorter: fuge perpetuo quod flatur ab austro,  
Quod coeno immundaeque grave est sudore paludis.  
Protenti potius campi mihi liber et agri  
85 Tractus et apricis placeant in collibus aurae  
Et molles zephyri pulsusque aquilonibus aër.  
Hic (iubeo) tibi nulla quies nulla otia sunt.  
Rumpe moras, agita assiduis venatibus apros  
Impiger, assiduis agita venatibus ursos.  
90 Nec tibi sit labor aërii cursu ardua montis  
Vincenti rapidum in valles deflectere cervum,  
Et longa lustrare altos indagine saltus.  
Vidi ego saepe malum qui iam sudoribus omne  
Finisset silvisque luëm liquisset in altis.  
95 Sed nec turpe puta dextram summittere aratro  
Et longum trahere incurvo sub vomere sulcum,  
Neve bidente solum et duras proscindere glebas  
Et valida aëriam quercum exturbare bipenni,  
Atque imis altam eruere ab radicibus ornum.  
100 Quin etiam, exercere domi quo te quoque possis,  
Parvam mane pilam versa mihi vespere versa,  
Et saltu et dura potes exsudare palaestra.  
Vince malum: nec te fallat, quod desidis otii  
Assidue desiderium lectique sequetur,  
105 Tu lecto ne crede, gravi ne crede sopori:  
His alitur vitium et placidae sub imagine pacis  
Decipit e dulcique trahit fomenta quiete.  
Nec non interea effugito quae tristia mentem  
Sollicitant, procul esse iube curasque metumque  
110 Pallentem ultricesque iras omnemque Minervae



- Addictum studiis animum, sed carmina sed te  
Delectent iuvenumque chori mixtaeque puellae.  
Parce tamen Veneri mollesque ante omnia vita  
Concubitus, nihil est nocuum magis, odit et ipsa  
115 Pulchra Venus tenerae contagem odere puellae.  
Quod sequitur, victus ratio tibi maxima habenda est,  
Nec sit cura tibi, neve observantia maior.  
Principio quoscunque amnes quoscunque paludes  
Quosque lacus liquidi pascunt quosque aequora pisces,  
120 Omne genus procul amoveo. Sunt quos tamen usus  
Liberius, quum res cogit, concedere possit.  
Omnibus his est alba caro non dura tenaxque,  
Quos petrae et fluviorum adversa marisque fatigant:  
Tales nant pelago phycides, rutilaeque per undas  
125 Auratae, gobiique et amantes saxea percae,  
Talis dulcifluum fluviorum scarus ad ora  
Sola saxa inter depastas ruminat herbas.  
Sed neque, quae stagnis volucres quaeque amnis altis  
Degere amant liquidisque cibum perquirere in undis  
130 Laudarim: tibi pinguis anas, tibi crudior anser  
Vitetur, potiusque vigil Capitolia servet,  
Viteturque gravi coturnix tarda sagina.  
Tu teneros lactes, tu pandae abdomina porcae,  
Porcae heu terga fuge et lumbis ne vescere aprinis,  
135 Venatu quamvis toties confeceris apros.  
Quin neque te crudus cucumis, non tubera captent,  
Neve famem cinara bulbisve salacibus exple.  
Non placeat mihi lactis amor, non usus aceti,  
Non fumosa mero spumantia pocula Baccho,  
140 Quales Cyraei colles campique Falerni



- Et Pucinus ager mittunt, aut qualia nostris  
Rhaetica dat parvo de collibus uva racemo.  
Nempe Sabina magis placeant, dilutaque tellus  
Quae tulit et multo domuerunt Naiades amne.
- 145 At, tibi si ex horto victus mensaeque Deorum  
Sunt animo atque olerum simplex et inemta voluptas,  
Non menthae virides, non laeta sisymbria desunt,  
Intybaque, et toto florentes frigore sonchi,  
Et sia fontanis semper gaudentia rivis,
- 150 Et thymbrae suaves et odoriferae calaminthae:  
Laeta meliphylla, et riguo buglossus ab horto  
Carpantur, plenisque ferax erucula palmis  
Atque olus, atque rumex, et salsi gramina crithmi,  
Ipsa lupum dumeta ferent, hinc collige primos
- 155 Asparagos, albae asparagos hinc collige vitis,  
Quum nondum explicuit ramos umbracula nondum  
Texuit et virides iussit pendere corymbos.  
Singula sed longum est nec percensere necesse,  
Iamque aliud vocor ad munus: iuvat in nova Musas
- 160 Naturae nemora Aoniis deducere ab umbris,  
Unde mihi si non e lauro intexere fronti  
Serta volent tantaque caput cinxisse corona,  
At saltem ob servata hominum tot millia dignum  
Censuerint querna redimiri tempora fronde.
- 165 Vere novo si quem morbus tenet aut et in ipso  
Autumno, si firma aetas, si sanguis abundat,  
Regalem mediamve lacerti incidere venam  
Proderit atque extra foedatum haurire cruorem.  
Praeterea, quocunque habeat te tempore pestis,
- 170 Corruptum humorem et contagem educere turpem



Ne pigeat, faciliq̃ue luem deponere ab alvo.  
Ante tamen ducenda para, concreta resolve,  
Et crassa attenua et lentore tenacia frange.

- Ergo Coryciumque thymum sit cura, thymumque  
175 Pamphylium, thymbrae similis qui durior exit,  
Prima tibi coxisse, lupique volubile gramen,  
Foeniculumque, apiumque, et amari germina capni.  
His polyporum hirtos imitata filicula cirros  
Additur, et lymphis tangi renuens adiantus,  
180 His sterile asplenum, his pictam phyllitida iunge:  
Quorum ubi decoctum permultis ante diebus  
Ebiberis, crudumque humorem incoxeris omnem,  
Tum scilla medicare acri, et colocynthide amara,  
Helleboroque gravi, nec non, quae in littore surgens  
185 Qua ludit maris unda ter evariata colorem  
Ter flores mutata die rem nomine signat,  
Herba potens radice, suum cui zinziber adde:  
Adde etiam anguineum cucumin, Nabathaeaeque thura,  
Myrrhamque, bdelamque, hammoniacique liquorem,  
190 Et lacrimam panaceam et dulci Colchica bulbo.

- His actis, si forte tibi frigentia corda  
Et molles animi fuerint, nec acerba placebit  
In primis tentare brevique extinguere pestem,  
Sed placidis agere et per tempora lenibus uti:  
195 Tum superest tibi cura animum ad fomenta relictā  
Vertere contagisque ad tenuia semina coecae  
Illa quidem consueta modis inserpere miris.  
Profuerint igitur, quaeque exsiccantia quaeque  
Marcori resinosa solent obsistere putri.  
200 Tales sunt myrrhae lacrimae, sunt talia thura,



Cedrusque, aspalathusque immortalisque cupressus,  
Et bene cum calamo spirans redolente cyperus.  
Ergo nec desint casiae, nec desit amomum,  
Macerve agallocumve tibi, nec cinnama odora.

205 Est etiam in pratis illud iuxtaque paludes  
Scordion, omnigenis quod tantum obstare venenis  
Contagique solet, parvo quaerenda labore  
Herba tibi, viret ipsa comis imitata chamaedryn  
Flore rubens referensque allii cum voce saporem.

210 Aurora nascente huius frondemque comantem  
Radicesque coque atque haustu te prolue largo.  
Sed neque carminibus neglecta silebere nostris,  
Hesperidum decus et Medarum gloria, citre,  
Silvarum: si forte sacris cantata poëtis

215 Parte quoque hac medicam non dedignabere Musam,  
Sic tibi sit semper viridis coma semper opaca  
Semper flore novo redolens, sis semper onusta  
Per viridem pomis silvam pendentibus aureis.  
Ergo ubi nitendum est coecis te opponere morbi

220 Seminibus, vi mira arbor Citherea praestat,  
Quippe illum Citherea suum dum plorat Adonim  
Munere donavit multo et virtutibus auxit.

Quorundam inventum est, vitrei intra concava vasis,  
Cui collum oblongum est venter turgescit in orbem,  
225 Aut hederæ folia, aut Ida mittente maniplos  
Dictamni, Illyricamve irim, rhamnive nigrantem  
Radicem, aut inulas coquere: in sublime solutus  
Effertur vapor et tenuis vacua omnia complet.

Ast ubi frigenti occursavit ab aëre vitro  
230 Cogitur et rorem liquidus densatur in udum,



- Decurritque vagis per aperta canalia rivis.  
Destillantis aquae cyathum sub lumina prima  
Luciferi potare iubent stratisque parare  
Sudorem, nec certe ab re: vis utilis olli est  
235 Reliquias morbi tenues dispergere in auras.  
Interea, si membra dolor convulsa malignus  
Torqueat, oesypo propera lenire dolorem  
Mastichinoque oleo, lentum quibus anseris unguen  
Emulsumque potes lini de semine mucum,  
240 Narcissumque, inulamque, liquentiaque adderemella,  
Coryciumque crocum, et vilem componere amurcam,  
At fauces atque ora malus si eroserit herpes,  
Tange nitro, et viridi medicata aerugine lymphæ  
Semina inure mala et serpentem interfice pestem.  
245 Verum ipsos ope non alia consumere achores  
Urentum quam vi poteris, quibus addere debes  
Pingue aliquid, quod secum intus siccantia portet.  
Haec eadem et miseros artus si qua ulcera pascunt  
Tollere, concretosque valebunt solvere callos.  
250 Si vero aut haec nequicquam tentasse videbis  
Aut vires animique valent ad fortia quaeque,  
Nec differre cupis, quin te committere acerbis  
Festines diramque brevi consumere pestem:  
Hinc alia inventa expediam, quae tristia quanto  
255 Sunt magis hoc tanto citius finire labores  
Aerumnasque mali poterunt, quippe effera labes  
Inter prima tenax et multo fomite vivax  
Nedum se haud vinci placidis et mitibus at nec  
Tractari sinit, et mansuescere dura repugnat.  
260 Sunt igitur styracem in primis qui, cinnabarinque



- Et minium, et stimmi agglomerant et thura minuta,  
Quorum suffitu pertingunt corpus acerbo,  
Absumuntque luem miseram et contagia dira.  
At vero et partim durum est medicamen et acre  
265 Partim etiam fallax, quo faucibus angit in ipsis  
Spiritus eluctansque animam vix continet aegram.  
Quocirca totum ad corpus nemo audeat uti  
Iudice me: certis fortasse erit utile membris  
Quae papulae informes Chironiaque ulcera pascunt.  
270 Argento melius persolvunt omnia vivo  
Pars maior, miranda etenim vis insita in illo est:  
Sive quod id natum est subito frigusque caloremque  
Excipere, unde in se nostrum cito contrahit ignem,  
Quodque est condensum humores dissolvit agitque  
275 Fortius, ut candens ferrum flamma acrius urit:  
Sive acres, unde id constat compagine mira,  
Particulae nexuque suo vinclisque solutae  
Introrsum ut potuere seorsum in corpora ferri,  
Colliquant concreta et semina pestis inurunt:  
280 Sive aliam vim fata illi et natura dedere.  
Cuius et inventum medicamen munere Divum  
Digressus referam. Quis enim admiranda Deorum  
Munera praetereat? Syriae nam forte sub altis  
Vallibus umbrosi nemora inter glauca salicti,  
285 Callirhoë qua fonte sonans decurrit amoenò,  
Fama est cultorem Diis sacri agrestibus horti  
Cultorem nemorum sectatoremque ferarum,  
Ilceæ labe gravem tanta, dum molle cyperum,  
Et casiam, et silvam late fragrantis amomi  
290 Irrigat, haec orasse Deos et talia fatum:



- Dii, quos ipse diu colui, tuque optima tristes  
Callirhoë quae sancta soles depellere morbos,  
Cui nuper ramosa ferens ego cornua cervi  
Aëria victor fixi capita horrida quercu:  
295 Dii, mihi crudelem misero si tollere pestem  
Hanc dabitis, quae me afflictat noctesque diesque,  
Ipse ego purpureas ipse albas veris et horti  
Primitias vobis violas ego lilia vobis  
Alba legam, primasque rosas primosque hyacinthos,  
300 Vestraque odoratis onerabo altaria sertis!  
Gramen erat iuxta viridans, sic fatus ut aestu  
Fessus erat viridi desedit graminis herba.  
Hic Dea, vicino quae sese fonte lavabat,  
Callirhoë liquido ex antro per lubrica musco  
305 Saxa fluens, iuveni dulci blandita susurro  
Lethaeum immisit somnum, sparsitque sopore  
Graminea in ripa et salicum nemus inter opacum.  
Atque illi visa est sacro se flumine tollens  
In somnis coram esse, pia et sic voce locuta:  
310 Ilceu, in extremo Diis tandem audite labore,  
Cura mei, tibi nulla salus quacunque videt Sol  
Speranda est terram magnam super. Hoc tibi poenae  
Dat Trivia et precibus Triviae exoratus Apollo,  
Ob sacrum iaculo percussum ad flumina cervum  
315 Et nostris affixa tibi capita horrida truncis.  
Nam, postquam illa feram exanimem per gramina vidit  
Abscisso capite et sacro sparsa arva cruore,  
Omnibus ingemuit silvis dirumque precata est  
Auctori. Oranti Latous tanta sorori  
320 Affuit et pestem misero immisere nefandam



- Durus uterque tibi: quin et quacunque videt Sol  
Interdixit opem, quare tellure sub ima,  
Si qua salus superest, coeca sub nocte petenda est.  
Est specus arboribus tectum atque horrore verendum  
325 Vicina sub rupe, Iovis qua plurima silva  
Accubat et raucum reddit coma cedria murmur.  
Huc, ubi se primis Aurora emittet ab undis,  
Ire para et nigrantem ipsis in faucibus agnam  
Mactato supplex atque, Ops tibi maxima, dic, hanc,  
330 Dic, ferio. Nigram tum Noctem umbrasque silentes  
Umbrarumque Deos ignotaque numina Nymphas  
Et thya venerare atrae et nidore cupressi.  
Hic tibi narranti causam auxiliumque vocanti  
Haud aberit Dea, quae coecae in penetralia terrae  
335 Deducat te sancta et opem tibi sedula praestet.  
Surge age nec vani speciem tibi concipe somni,  
Illa ego sum quae culta vago per pinguia fonte  
Dilabor Dea vicinis tibi cognita ab undis.  
Sic ait et se caeruleo cita condidit amne.  
340 Ille autem, ut placidus cessit sopor, omina laetus  
Accipit et Nympham precibus veneratur amicam.  
O sequor, o quocunque vocas, pulcherrima fontis  
Vicini Dea Callirhoë! Tum, postera primum  
Exsurgens Aurora suos ubi protulit ortus,  
345 Monstratum Iovis in silva sub rupibus altis  
Antrum ingens petit et nigrantem tergora primo  
Vestibulo sistit pecudem magnaеque trementem  
Mactat Opi: tibi que, inquit, ego hanc Ops maxima macto.  
Tum Noctem Noctisque Deas ignota precatur  
350 Numina, iamque simul thyan atramque cupressum



Urebat, quum vox terrae revoluta cavernis  
Longe audita sacras Nympharum perculit aures,  
Nympharum quibus aera solo sunt condita curae.  
Extemplo commotae omnes ac coepta reponunt:

- 355 Sulfureos forte ut latices et flumina vivi  
Argenti, mox unde nitens concresceret aurum,  
Tractabant, gelidoque prementes fonte coquebant.  
Centum ignis spissi radios centum aetheris usti  
Bis centum concretorum terraeque marisque  
360 Miscuerant nostros fugientia semina visus.

At Lipare, Lipare, argenti cui semina et auri  
Cura data et sacrum flammis adolere bitumen,  
Continuo obscurae latebrosa per avia terrae  
Ilcea adit firmansque animum sic incipit ipsa:

- 365 Ilceu (nanque tuum nec nomen nec mihi labes  
Ignota est, nec quid venias), iam corde timorem  
Exue, nequicquam non te huc carissima mittit  
Callirhoë, tibi parta salus tellure sub ima est.  
Tolle animos et me per opaca silentia terrae  
370 Insequere: ipsa adero et praesenti numine ducam.  
Sic ait et se antro gradiens praemittit opaco.  
Ille subit magnos terrae miratus hiatus  
Squallentesque situ aeterno et sine lumine vastas  
Speluncas terramque meantia flumina subter.

- 375 Tum Lipare: hoc quodcunque patet quam maxima terra  
Hunc totum sine luce globum, loca subdita nocti [est,  
Dii habitant: imas retinet Proserpina sedes,  
Flumina supremas quae sacris concita ab antris  
In mare per latas abeunt resonantia terras,

- 380 In medio dites Nymphae, genera unde metalli,



- Aerisque argentique aurique nitentis origo,  
Quarum ego nunc ad te miserans ipsa una sororum  
Advenio, illa ego, quae venas per montis hiantes,  
Callirhoae haud ignota tuae, fumantia mitto  
385 Sulfura. Sic ibant terra et caligine tecti.  
Iamque exaudiri crepitantes sulfure flammae  
Conclusique ignes stridentiaque aera caminis.  
Haec regio est late variis ubi foeta metallis,  
Virgo ait, est tellus, quorum vos tanta cupido  
390 Exercet superas coeli qui cernitis auras.  
Haec loca mille Deae coecis habitamus in antris,  
Nocte Deae et Tellure satae, quis munera mille  
Mille artes. Studium est aliis deducere rivos,  
Scintillas aliis rimari et sparsa per omnem  
395 Semina tellurem flammaram ignisque corusci.  
Materiam miscent aliae massamque coërcent  
Obicibus multa et gelidarum inspergine aquarum.  
Non procul eruptis fumantia tecta caminis  
Aetnaei Cyclopes habent, versantque coquuntque  
400 Vulcano stridente atque aera sonantia cudunt,  
Laeva haec abstrusum per iter via ducit ad illos.  
Dextera sed sacri fluvii te sistet ad undam,  
Argento fluitantem undam vivoque metallo,  
Unde salus speranda. Et iam aurea tecta subibant  
405 Rorantesque domos spodiis, fuligineque atra  
Speluncas varie obductas et sulfure glauco,  
Iamque lacus late undantes liquidoque fluentes  
Argento iuxta astabant ripasque tenebant.  
Hic tibi tantorum requies inventa laborum,  
410 Subsequitur Lipare, postquam ter flumine vivo



- Perfusus sacra vitium omne reliqueris unda.  
Sic fatur, simul argenti ter fonte salubri  
Perfundit, ter virgineis dat flumina palmis  
Membra super, iuvenem toto ter corpore lustrat  
415 Mirantem exuvias turpes et labe maligna  
Exutos artus pestemque sub amne relictam.  
Ergo age, quum primum coeli te purior aër  
Accipiet nitidamque diem solemque videbis,  
Sacra para et castam supplex venerare Dianam  
420 Indigenasque Deos et Numina fontis amici.  
Sic virgo, et iuvenem tanto pro munere grates  
Solventem e nocte aetherias educit in oras  
Dimittitque alacrem atque optata in lumina reddit.  
Accepit nova fama fidem populosque per omnes  
425 Prodiit haud fallax medicamen, coeptaque primum  
Misceri argento fluitanti axungia porcae.  
Mox etiam Oriciae simul adiuncta est terebinthi  
Et laricis resina aëriæ. Sunt qui unguen equinum  
Ursinumve adhibent bdelæ cedrique liquorem.  
430 Nonnulli et myrrhæ guttas et mascula thura  
Adiiciunt miniumque rubens et sulfura viva.  
Haud vero mihi displiceat, componere si quem  
Trita melampodia atque arentem iuverit irim,  
Galbanaque et lasser graveolens, oleumque salubre  
435 Lentisci, atque oleum haud experti sulfuris ignem.  
His igitur totum oblinere atque obducere corpus  
Ne obscoenum ne turpe puta: per talia morbus  
Tollitur et nihil esse potest obscoenius ipso.  
Parce tamen capiti et præcordia mollia vita.  
440 Tum super et vittas adstringe et stuppea necte



Vellera, dein stratis tegmento imponere multo  
Dum sudes foedaeque fluant per corpora guttae.  
Haec tibi bis quinis satis est iterasse diebus:  
Durum erit, at quicquid tulerit res ipsa ferendum est.

445 Aude animis, tibi certa salus stans limine in ipso  
Signa dabit: liquefacta mali excrementa videbis  
Assidue sputo immundo fluitare per ora,  
Et largum ante pedes tibi mirabere flumen.  
Ora tamen foeda erodent ulcuscula, sed tu

450 Lacte fove et cocto cytini, viridisque ligustri.  
Tempore non alio generosi pocula Bacchi  
Annuerim sumenda tibi, purumque Falernum,  
Et Chia, et pateris spumantia Rhaetica largis.

Sed iam age vicinae victor gratare saluti:  
455 Ultima adest tibi cura eadem et placidissima, corpus  
Abluere et lustrare artus ac membra piare  
Stoechade, amaracinisque comis, et rore marino,  
Verbenaque sacra, et bene olentibus heracleis.



## LIBER TERTIUS.

- S**ED iam me nemora alterius felicia mundi  
Externique vocant saltus, longe assonat aequor  
Herculeas ultra metas et littora longe  
Applaudunt semota. Mihi nunc magna Deorum  
5 Munera et ignoto devecta ex orbe canenda  
Sancta arbos, quae sola modum requiemque dolori  
Et finem dedit aerumnis. Age Diva beatum  
Uranie venerare nemus, crinesque revinctam  
Fronde nova iuвет in medica procedere palla  
10 Per Latium et sanctos populis ostendere ramos:  
Et iuвет haud unquam nostrorum aetate parentum  
Visa prius nullive unquam memorata referre.  
Unde aliquis forsā, novitatis imagine mira  
Captus et heroas et grandia dicere facta  
15 Assuetus, canat auspiciis maioribus ausas  
Oceani intacti tentare pericula puppes,  
Nec non et terras varias et flumina et urbes  
Et varias memoret gentes et monstra reperta,  
Dimensasque plagas alioque orientia coelo  
20 Sidera et insignem stellis maioribus Arcton



- Nec taceat nova bella omnemque illata per orbem  
Signa novum et positas leges et nomina nostra,  
Et canat (auditum quod vix venientia credant  
Saecula) quodcunque Oceani complectitur aequor  
25 Ingens omne una obitum mensumque carina.  
Felix, cui tantum dederit Deus, at mihi vires  
Arboris unius satis est usumque referre,  
Et quo inventa modo fuerit nostrasque sub auras  
Advena per tantum pelagi pervenerit aequor.  
30 Oceano in magno ardenti sub sidere Cancri,  
Sol ubi se nobis media iam nocte recondit,  
Hac ignota tenus tractu iacet insula longo,  
Hispanam gens inventrix cognomine dixit:  
Auri terra ferax sed longe ditior una  
35 Arbore: voce vocant patrii sermonis Hyacum.  
Ipsa teres ingensque ingentem vertice ab alto  
Diffundit semper viridem semperque comantem  
Arbuteis silvam foliis, nux parva sed acris  
Dependet ramis et plurima frondibus haeret.  
40 Materia indomita est, duro et paene aemula ferro  
Robora, quae resinam sudant incensa tenacem.  
Dissectae color haud simplex, in cortice lauri  
Exteriore viret levor, pars altera pallet  
Buxea, at interior nigro suffusca colore est  
45 Iuglandemque ebumque inter, quod si inde ruberet,  
Iam poterat variis aequare coloribus irim.  
Hanc gens illa colit studioque educere multo  
Nititur, hac late colles campique patentes  
Hac omnis vestitur ager, nec sanctius illis  
50 Est quicquam aut potiore usu: quippe omnis in illa



- Spes iacet hanc contra pestem quae coelitus illic  
Perpetua est. Validos abiecto cortice ramos  
Multa vi tundunt aut in segmenta minuta  
Elimant, puroque scobes in fonte reponunt,  
55 Dum bibulas noctemque diemque emaceret humor,  
Inde coquunt: nec non illos ea cura fatigat,  
Vulcano ne forte furens erumpat aquae vis  
Et superundantem spumam proiiciat in ignes.  
Spuma quippe linunt, si quicquam e corpore toto  
60 Abscedit, si quicquam aegros depascitur artus.  
Dimidia absumpta superest quodcunque reponunt  
Divini laticis. Quin et segmenta relictas  
Rursus ut ante coquunt addentes suaveliquens mel.  
Scilicet hunc unum mensis accedere potum  
65 Et lex ipsa iubet gentis mandatque sacerdos.  
Servatum at laticem et decocti pocula primi  
Bina die quaque assumunt, quum surgit ab ortu  
Lucifer et sero egreditur quum Vesper Olympo.  
Nec prius absistunt potu, quam menstrua cursum  
70 Luna suum et totum peragrans perfecit orbem  
Fraternasque iterum convenerit aemula bigas.  
Interea coecis sese penetralibus abdunt,  
Quo neque vis venti non halitus aëris ullus  
Insinuet sese et gelidis afflatibus obsit.  
75 Quid mirandum aequae memorem, super omnia victum  
Quam tenuem quam magna sibi ieiunia poscant?  
Quippe solet satis esse, ipsum dum corpus alatur  
Dum superet vita et tantum ne membra fatiscant.  
Ne tamen ah ne tanta time, sacer illicet haustus  
80 Ille modo ambrosiae vires reficitque fovetque



Inque occulta gerit ieiunis pabula membris.  
Nectare ab epoto binas non amplius horas  
Imponunt sese stratis, medicamen ut intro  
Large eat et calido sudorem e corpore ducat.

85 Interea vacuas pestis vanescit in auras,  
Et (dictu mirum) apparet iam pustula nulla,  
Iamque nomae cessere omnes, iam fortia liquit  
Membra dolor, primoque redit cum flore iuventa:  
Et iam Luna suum remeans nova circuit orbem.

90 Quis Deus hos illis populis monstraverit usus,  
Qui demum et nobis casus aut fata tulere  
Hos ipsos, unde et sacrae data copia silvae,  
Nunc referam. Missae quaesitum abscondita Nerci  
Aequora in occasum Solisque cubilia pinus

95 Littoribus longe patriis Calpeque relictis  
Ibant oceano in magno pontumque secabant,  
Ignaraeque viae et longis erroribus actae.  
Quas circum innumerae properantes gurgite ab omni  
Ignoti nova monstra maris Nereides udae

100 Adnabant celsas miratae currere puppes  
Salsa super pictis volitantes aequora velis.

Nox erat et puro fulgebat ab aethere Luna  
Lumina diffundens tremuli per marmora ponti,  
Magnanimus quum tanta heros ad munera fatis

105 Delectus dux errantis per caerula classis  
Luna, ait, o pelagi cui regna haec humida parent,  
Quae bis ab aurata curvastis cornua fronte,  
Curva bis explesti, nobis errantibus ex quo  
Non ulla apparet tellus, da littora tandem

110 Aspicere et dudum speratos tangere portus,



- Noctis honos coelique decus Latonia virgo.  
Audiit orantem Phoebe, delapsaque ab alto  
Aethere se in faciem mutat, Nereia quali  
Cymothoë Clothoque natant, iuxtaque carinam  
115 Astitit et summo pariter nans aequore fatur:  
Ne nostrae dubitate rates, lux crastina terras  
Ostendet fidoque dabit succedere portu.  
Sed vos littoribus primis ne insistite, dudum  
Ultra fata vocant: medio magna insula ponto  
120 Est Ophyre, huc iter est vobis hic debita sedes  
Imperiique caput. Simul haec effata carinam  
Impulit, illa levi cita dissecat aequora cursu.  
Aspirant faciles aerae, et iam clarus ab undis  
Surgebat Titan, humiles quum surgere colles  
125 Umbrosi procul et propior iam terra videri  
Incipit. Acclamant nautae terramque salutant  
Terram exoptatam. Tum portu et littore amice  
Excepti, Diis vota piis in littore solvunt,  
Quassatasque rates defessaque corpora curant.  
130 Inde ubi quarta dies pelago crepitansque vocavit  
Vela Notus, remis insurgitur, altaque rursum  
Corripiunt maria et laeti freta caerula sulcant.  
Linquitur incerto fluitans Anthylia ponto,  
Atque Hagia, atque alta Ammerie, execrataque tellus  
135 Cannibalum, et ripa Gyane nemorosa virenti.  
Protinus innumerae panduntur turribus altis  
Insulae oceano in vasto, quas inter opacis  
Undantem silvis unam cursuque sonantem  
Fluminis aspiciunt, magno qui spumeus alveo  
140 In mare fulgentes auro subvectat arenas.



- Huius in ora placet pronas appellere puppes,  
Invitant nemora et dulces e flumine lymphae.  
Iamque solo viridante alacres ripaque potiti  
In primis terram ignotam Nymphasque salutant  
145 Indigenas, Geniumque loci, teque aurifer Amnis  
Quisquis in arva maris nitida perlaberis unda.  
Tum duram Cererem et patrii carchesia Bacchi  
Aggere in herboso expediunt, dein quaerere si qui  
Mortales habitent, pars fulvam fluminis undam  
150 Mirari mixtamque auro disquirere arenam.  
Forte per umbrosos silvarum plurima ramos  
Assidue volitabat avis, quae picta nitentes  
Caeruleo pennas rostro variata rubenti  
Ibat nativo secura per avia luco.  
155 Has iuvenum manus ut silvas videre per altas  
Continuo cava terrificis horrentia bombis  
Aera et flammiferum tormenta imitantia fulmen  
Corripiunt, Vulcane tuum, dum Theutonas armas  
Inventum dum tela Iovis mortalibus affers.  
160 Nec mora, signantes certam sibi quisque volucrem,  
Inclusam, salicum cineres sulfurque nitrumque,  
Materiam accendunt servata in reste favilla.  
Fomite correpto diffusa repente furit vis  
Ignea circumsepta simulque cita obice rupto  
165 Intrusam impellit glandem, volat illa per auras  
Stridula, et exanimes passim per prata iacebant  
Deiectae volucres: magno micat ignibus aër  
Cum tonitru quo silva omnis ripaeque recurvae  
Et percussa imo sonuerunt aequora fundo.  
170 Pars avium nemus in densum conterrita et altos



- Se recipit scopulos, quorum de vertice summo  
Horrendum una canit (dictu mirabile) et aures  
Terrificis implet dictis ac talibus infit:  
Qui Solis violatis aves sacrasque volantes  
175 Hesperii, nunc vos quae magnus cantat Apollo  
Accipite et nostro vobis quae nuntiat ore:  
Vos quanquam ignari longum quaesita secundis  
Tandem parta Ophyrae tetigistis littora ventis,  
Sed non ante novas dabitur summittere terras  
180 Et longa populos in libertate quietos  
Molirique urbes ritusque ac sacra novare,  
Quam vos infandos pelagi terraeque labores  
Perpessi diversa hominum post proelia multi  
Mortua in externa tumuletis corpora terra,  
185 Navibus amissis pauci patria arva petetis,  
Frustra alii socios quaeretis magna remensi  
Aequora, nec nostro deerunt Cyclopes in orbe.  
Ipsa inter sese vestras discordia puppes  
In rabiem ferrumque trahet, nec sera manet vos  
190 Illa dies foedi ignoto quum corpora morbo  
Auxilium silva miseri poscetis ab ista,  
Donec poeniteat scelerum. — Nec plura locuta  
Horrendum stridens densis sese abdidit umbris.  
Ollis ossa rigor subitus percurrit et omnis  
195 Palluit ac gelida fugit formidine sanguis.  
Tum vero sacras volucres Divosque precati,  
In primis Solem et sanctum servantia lucum  
Numina supplicibus venerantur agrestia votis:  
Pacem orant rursumque Ophyren fluviumque salutant.  
200 Interea e silvis nigrum genus ora comasque



- Ad naves nova turba virum concurrat inermis,  
Pectora nudi omnes evincti frondibus omnes  
Paciferis: tanta qui celsas mole carinas  
Mirati vestesque virum fulgentiaque arma  
205 Vix satis expleri possunt, et ab aethere missi  
Sive homines sive heroes sint sive Deorum  
Numina adorantium ritu precibusque salutant:  
Ante alios ipsum regem, cui munera laeta,  
E ripis collectum aurum et cerealia dona  
210 Et patrios fructus et mella liquentia portant.  
Vestibus ipsi etiam nostris et munere multo  
Donati exceptique mero nova gaudia miscent.  
Non aliter, quam si mensis dapibusque Deorum  
Mortalis quisquam adscitus felixque futurus  
215 Hauriat aeternum coelestia pocula nectar.
- Ergo, ubi amicitiae securos foedere utrinque  
Firmavere animos, habita et commercia gentis,  
Ipsi inter sese reges in littore laeti  
Complexu iungunt dextras et foedera firmant.
- 220 Alter gossipio tenui pectusque femurque  
Praecinctus, viridi limbum pingente smaragdo,  
Ora niger, iaculo armatur cui dextera acuto  
Squamosi spoliū sustentat laeva draconis.  
Alter at intexto laenam circumdatus auro,  
225 Quam subter rutila arma micant, capiti aerea cassis  
Insidet et pictae volitant in vertice cristae,  
Fulgenti ex auro torques cui candida colla  
Cingunt atque ensis lateri dependet Iberus.  
Et iam commixti populi hospitioque recepti,  
230 Hi tectis domibusque altis in navibus illi,



Laetitia ludisque dies per pocula ducunt.

Forte loco lux festa aderat, Solique parabant  
Ultori facere umbroso sacra annua luco,  
Hesperiaëque Ophyraëque manus convenerat omnis.

235 Hic convalle cava ripae viridantis in herba

Selectorum ingens numerus, matresque virique  
Confusi plebs atque patres puerique senesque  
Astabant, animis tristes et corpora foedi  
Squallentes crustis omnes taboque fluentes,

240 Quos circumfusus albenti in veste sacerdos

Pura lustrat aqua et ramo frondentis Hyaci.  
Tum niveum ante aras caedit de more iuvenum  
Et iuxta positum pastorem sanguine caesi  
Respergit pateraue rigat, Solique potenti

245 Ad numeros Paëana canit, nec cetera turba

Non sequitur, mactantque sues mactantque bidentes  
Visceribusque veru tostis epulantur in herba.  
Obstupuit gens Europae ritusque sacrorum  
Contagemque alio non usquam tempore visam.

250 At dux multa animo tacitus secum ipse volutans,

Hic erat ille, inquit, morbus (Dii avertite casum!)

Ignotum interpres Phoebi quem dira canebat.

Tum regem indigenam (ut sermo fandique facultas  
Iam communis erat) cui sint solennia Divum

255 Scitatur, quid tanta astet convalle sub alta

Languentum miseranda manus, quid pastor ad aras  
Sacra inter caesi respersus sanguine tauri.

Quem contra: Hesperiae o heros fortissime pubis,

Rex ait, hi gentis ritus haec sacra quotannis

260 Ultori de more Deo celebramus, origo



- Antiqua est veteresque patrum fecere parentes.  
Quod si externorum mores hominumque labores  
Audivisse iuvat, primaeva ab origine causam  
Sacrorum et pestis miserae primordia pandam.
- 265 Forsitan Atlantis vestras pervenit ad aures  
Nomen et ex illo generis longo ordine ducti.  
Hac et nos longa serie de stirpe profecti  
Dicimur, heu quondam felix et cara Deum gens,  
Dum coelum colere et Superis accepta referre
- 270 Maiores suevere boni, sed numina postquam  
Contemni coeptum est luxu fastuque nepotum  
Ex illo quae sint miseros quantaecque secutae  
Aerumnae, vix fando unquam comprehendere possem.  
Insula tum prisci regis de nomine dicta
- 275 Ingenti terrae concussa Atlantia motu  
Corruit absorpta Oceano, quem mille carinis  
Sulcavit toties terrae regina marisque.  
Ex illo et pecudes et grandia quadrupedantum  
Corpora non ullis unquam reparata diebus
- 280 Aeternum periere: externaque victima sacris  
Caeditur, externus nostras cruor imbuat aras.  
Tum quoque ethaec infanda lues, quam nostra videtis  
Corpora depasci, quam nulli aut denique pauci  
Vitamus, Divum offensis et Apollinis ira
- 285 De coelo demissa omnes grassatur in urbes.  
Unde haec sacra novo primum solennia ritu  
Instituere patres, quorum haec perhibetur origo:  
*Syphilus* (ut fama est) ipsa haec ad flumina pastor  
Mille boves niveas mille haec per pabula regi
- 290 Alcithoo pascebat oves, et forte sub ipsum



- Solstitium urebat sitientes Sirius agros,  
Urebat nemora et nullas pastoribus umbras  
Praebebant silvae, nullum dabat aura levamen.  
Ille gregem miseratus et acri concitus aestu  
295 Sublimem in Solem vultus et lumina tollens,  
Nam quid Sol te, inquit, rerum patremque Deumque  
Dicimus et sacras vulgus rude ponimus aras,  
Mactatoque bove et pingui veneramur acerra,  
Si nostri nec cura tibi est nec regia tangunt  
300 Armenta? an potius Superos vos arbitrer uri  
Invidia? mihi mille nivis candore iuvencae  
Mille mihi pascuntur oves: vix est tibi Taurus  
Unus, vix Aries coelo (si vera feruntur)  
Unus, et armenti custos Canis arida tanti.  
305 Demens quin potius regi divina facesso,  
Cui tot agri tot sunt populi, cui lata ministrant  
Aequora et est Superis ac Sole potentia maior?  
Ille dabit facilesque auras frigusque virentum  
Dulce feret nemorum armentis, aestumque levabit.  
310 Sic fatus, mora nulla, sacras in montibus aras  
Instituit regi Alcithoo et divina facessit.  
Hoc manus agrestum hoc pastorum caetera turba  
Exsequitur, dant thura focis incensa litantque  
Sanguine taurorum et fumantia viscera torrent.  
315 Quae postquam rex, in solio dum forte sederet  
Subiectos inter populos, turbamque frequentem  
Agnovit, Divum exhibito gavisus honore,  
Non ullum tellure coli se vindice Numen  
Imperat, esse nihil terra se maius in ipsa:  
320 Coelo habitare Deos, nec eorum hoc esse quod infra est.



- Viderat haec, qui cuncta videt, qui singula lustrat,  
Sol pater atque animo secum indignatus iniquos  
Intorsit radios et lumine fulsit acerbo.  
Aspectu quo terra parens correptaque ponti  
325 Aequora quo tactus viro subcanduit aër.  
Protinus illuvies terris ignota profanis  
Exoritur. Primus regi qui sanguine fuso  
Instituit divina sacrasque in montibus aras  
Syphilus ostendit turpes per corpus achores,  
330 Insomnes primus noctes convulsaque membra  
Sensit et a primo traxit cognomina morbus,  
Syphilidemque ab eo labem dixere coloni.  
Et mala iam vulgo cunctas diffusa per urbes  
Pestis erat, regi nec saeva pepercerat ipsi.  
335 Itur ad Ammericen silva in Cartheside Nympham,  
Cultricem nemorum Ammericen, quae maxima luco  
Interpres Divum responsa canebat ab alto.  
Scitantur, quae causa mali, quae cura supersit.  
Illa refert: spreti vos o vos numina Solis  
340 Exercent: nulli fas est se aequare Deorum  
Mortalem, date thura Deo et sua ducite sacra  
Et numen placate, iras non proferet ultra,  
Quam tulit aeterna est, nec iam revocabilis unquam  
Pestis erit. Quicumque solo nascetur in isto  
345 Sentiet. Ille lacus Stygios fatumque severum  
Iuravit. Sed enim, si iam medicamina certa  
Expetitis, niveam magnae mactate iuencam  
Iunoni, magnae nigrantem occidite vaccam  
Telluri: illa dabit felicia semina ab alto,  
350 Haec viridem educet felici e semine silvam,



- Unde salus. Simul obticuit, specus intus et omne  
Excussum nemus et circum stetit horror ubique.  
Illi obeunt mandata: sua ipsi altaria Soli  
Instituunt, niveam Iuno tibi magna iuvenecam,  
355 Nigrantem Tellus mactant tibi maxima vaccam.  
Mira edam, at Divos iuro et monumenta parentum,  
Haec sacra quam nemore hoc toto vos cernitis, arbor  
Ante solo nunquam fuerat quae cognita in isto,  
Protinus e terra virides emittere frondes  
360 Incipit et magna campis pubescere silva.  
Annua confestim Soli facienda sacerdos  
Ultori nova sacra canit. Deducitur ipse  
Sorte data qui pro cunctis cadat unus ad aram  
Syphilus, et iam farre sacro vittisque paratis  
365 Purpureo stabat tincturus sanguine cultros,  
Tutatrix vetuit Iuno et iam mitis Apollo,  
Qui meliorem animam miseri pro morte iuvenum  
Supposuere feroque solum lavere cruore.  
Ergo eius facti aeternum ut monumenta manerent,  
370 Hunc morem antiqui primum statuere quotannis  
Sacrorum. Ille tuum testatur Syphile crimen,  
Victima vana, sacras deductus pastor ad aras.  
Illa omnis, quam cernis, inops miserandaque turba  
Tacta Deo est veterumque luit commissa parentum,  
375 Cui votis precibusque piis numerisque sacerdos  
Conciliat vates Divos et Apollinis iras.  
Lustrati ingentes ramos et robora sanctae  
Arboris advectant tectis, libamine cuius  
Vi mira infandae labis contagia pellunt. —  
380 Talibus atque aliis tempus per multa trahebant



- Diversis populi commixti e partibus orbis.  
Interea Europae fuerant quae ad cara remissae  
Littora iam rursus puppes freta lata remensae  
Mira ferunt: late (proh fata occulta Deorum!)
- 385 Contagem Europae coelo crebrescere eandem,  
Attonitasque urbes nullis agitare medelis.  
Quin etiam gravior naves it rumor in omnes,  
Illo eodem classem morbo iuvenumque teneri  
Haud numerum exiguum et totis tabescere membris.
- 390 Ergo haud immemores, diras cecinisse volucres,  
Affore, quum silva auxilium poscatur ab illa,  
Continuo faciles Nymphas Solemque precati  
Intacti nemoris ramos et robora ab alto  
Convectare parant luco, medicataque sumunt
- 395 Pocula pro ritu gentis, quo munere tandem  
Contagem pepulere feram. Quin dona Deorum  
Haud patriae obliti et felicem ad littora silvam  
Nostra iubent ferri, coelo si forsitan isto  
Assimilem pellant labem: nec fata secundos
- 400 Ipsa negant Zephyros facilisque aspirat Apollo.  
Munera vos Divum primi accepistis Iberi  
Praesens mirati auxilium, nunc cognita Gallis  
Germanisque Scythisque, orbe et gavisâ Latino  
Iam nunc Europam vecta est Huyacus in omnem.
- 405 Salve, magna Deum manibus sata semine sacro,  
Pulchra comis, spectata novis virtutibus arbos:  
Spes hominum, externi decus et nova gloria mundi,  
Fortunata nimis, natam si numina tantum  
Orbe sub hoc homines inter gentemque Deorum
- 410 Perpetua sacram voluissent crescere silva.



Ipsa tamen, si qua nostro te carmine Musae  
Ferre per ora virum poterunt, hac tu quoque parte  
Nosceris coeloque etiam cantabere nostro.

Si non te Bactra et tellus extrema sub Arcto

415 Non Meroë Libycisque Ammon combustus arenis,

At Latium at viridis Benaci ad flumina ripa

Audiet et molles Athesi labente recessus,

Et sat erit, si te Tiberini ad fluminis undam

Interdum leget et referet tua nomina BEMBUS.



## NOTAE

### IN LIBRUM PRIMUM.

---

15. *Pietro Bembo*, natus 1470, Leoni X. Pont. Max. a literis, a Paulo III. purpura sacerdotali donatus, poëta latinus et historicus scriptor non ignobilis, hominum doctorum fautor et amicus.
16. Ioannes Medicaeus, sub nomine Leo X. Pontifex Max. ab anno 1513 ad annum 1521, artium liberalium ipse cultor et munificentissimus patronus.
31. Benacus lacus, hodie *Lago di Garda*, in agro Veronensi.
35. Christophorus Columbus et eius socii in novo orbe detegendo.
97. Elephas seu Elephantiasis morbus, leprae species, quae Romae primum apparuit, cum Pompeius M. ex Africa rediret.
98. Lichen seu Mentagra, morbus quidam cutaneus, Romae primo visus, ut ferunt, sub Tiberii Claudii Caesaris principatu medio. (Plin. 26. 1.) — Omnes, quas vidimus, editiones habent *incola Nili*, excepta Romana anni 1531 quam secuti sumus.
110. In hoc versu omnes editiones habent *accolit*, excepta Romana iam citata, quam etiam hic



- secuti sumus, utpote antiquissimam et quae lectionem exhiberet sensui magis congruam.
118. Fortasse rectius legeretur *infecerit*, quam lectionem vero nulla exhibet editio.
186. Loquitur poëta forsitan de morbo atrocissimo, qui sub nomine Mortis nigrae (*der schwarze Tod*) regnavit annis 1348 — 1350, et a coniunctione Martis, Iovis et Saturni deducebatur a medicis astrologicis illius temporis. Poëticae igitur et non satis exacte dictum est *bis centum* etc.
204. Descriptio poëtica coniunctionis Martis et Saturni in signo Cancri, a qua coniunctione, quae anno 1484 locum habuit, derivat, cum multis aliis sui aevi medicis, morbi Gallici originem Fracastorius.
211. Iovianum Pontanum, qui librum scripsit astrologicum „Urania sive de stellis“, esse hunc vatem dicunt interpretes. Natus erat Pontanus anno 1426, mortuus est anno 1503. Cfr. Syphil. II. 38 sq.
272. Antiquiores edd. habent *caprigenum genus*, recentiores quaedam *capr. pecus*.
277. Paucae e recentioribus editionibus habent *longe via mortis*, antiquiores omnes *mora*.
314. Non in hoc loco solum sed etiam in libro secundo de morbis contagiosis (cap. 12.) bene praedixit Fracastorius morbum Gallicum non semper duraturum, sed penitus eum aliquando dispariturum, forsitan etiam aliquando denuo rediturum.
360. Pro *ut saepe* recentiorum editionum habent antiquiores *tum saepe*. Phyllidis arbor tristis est Amygdalus.
383. Ollius in pascuis Sebinis Cenomanorum, est



flumen *Oglio* in Longobardica regione Italiae superioris. *Lago d'Iseo* est antiquorum Lacus Sebinus.

407. 408. Desunt hi duo versus in editione huius carminis Basileensi anni 1536, in opp. Fracast., Venet., 1555, in Luisinianae collectionis editione Veneta et Leidensi. Habet vero hos versus antiqua editio Syphilidis, quae Romae prodiit anno 1531; habent plures recentiores opp. Frac. et Syphilidis editiones.

418. *Omina* habet editio Syphilidis Romana et Basileensis, *omnia* plures aliae recentiores. Sensus est: dira omina videntur tartareos lacus ab imo barathro excivisse etc.

425—432. Meminit poëta occupationem urbis Neapolitanae per Carolum VIII, regem Galliae, et desperatum eius contra Italorum copias proelium ad *Taro* seu Tarrum fluvium, qui ab Eridano excipitur.

433. Sermo est de pugna Venetorum infelici apud *Ghiera d'Adda*, ad ripas Abduae seu Adduae, fluminis itidem ab Eridano excepti.

445. Verona antiquissima civitas, Catulli, Plinii iunioris, Vitruvii et Fracastorii ipsius patria.

454. Marci Antonii Turriani, amici coniunctissimi, mortem innuit poëta.

461. Editio Romana habet *Sacra*, Basileensis et plures aliae *Sarca*, quam lectionem secuti sumus, carminis Fracastoriani in obitum Turrii memores, ubi legitur: „*Et vos extremi flestis Hyperborei, sed mage Benacusque senex et Sarca etc.*“

---



## NOTAE IN LIBRUM SECUNDUM.

- 24—34. Asiae orientalis et australis accuratior cognitio Lusitanorum navigationibus saeculo XV. peractis debetur; cfr. *Ramusio viaggi* Tom. I.
- 35—37. Americam a Christophoro Columbo detectam et coelum australe, insignibus conspicuum sideribus, innuit poëta.
- 38—42. Iterum de Pontano poëta sermo est, uti libro I., v. 211.
167. Fiat venaesectio ex vena basilica vel mediana brachii.
172. Praeparetur secundum leges artis medicae corpus ante institutam purgationem.
- 174—180. Coquantur thymus, lupulus, foeniculum, apium, fumaria, polypodium, capillus Veneris, asplenium et scolopendrium.
184. Veterum Tripolion, recentiorum forsan Plumbago europaea vel Aster tripolium.
- 188—190. Cucumis anguinus, thus, myrrha, bdellium, ammoniacum, opopanax et hermodactyli.
206. Scordion, cuius herbae virtutibus adeo confisus est Fracastorius, ut electuarium inde componeret, quod passim adhuc in officinis pharmacopoeorum prostat sub nomine *Diascordion* Fracastorii.
212. De citro Medica arbore odas et epigrammata composuisse dicitur Fracastorius, quae vero perierint.
223. Destilletur aqua medicata ex foliis hederæ, dictamni Cretici, radicibus iridis Illyricæ, rhamni et enulae, cuius aquae cyathus mane sumatur ad sudorem eliciendum.



260. Fumigatio mercurialis ex cinnabare, minio et stibio cum styrace et thure, quam ob noxios effectus partialem tantummodo suadet Fracastorius.
270. Fracastorii temporibus internus mercurii contra morbum Gallicum usus iam maiori medicorum parti innotuit et acceptus erat, quamvis a quibusdam tanquam noxius damnaretur. Elegantem de mercurii usu medico detecto fabulam exhibet poëta v. 283 sq.
340. *Omnia* pro *omina* falso habent edd. quaedam, Romana habet *omina* in Emendandis.
357. *Promentes* edd. quaedam recentiores, minus bene, cum syllaba *pro* in hac voce producat, versus vero brevem postulet.
- 426—435. Fiat unguentum e mercurio vivo, adipe porcina, terebinthina et vulgari et laricina. Vel e mercurio vivo cum adipe equina aut ursina, bdellio, cedria, myrrha, thure, minio et sulfure, quibus addi potest radix hellebori nigri et iridis, galbanum, asa foetida, oleum mastichinum et balsamum sulfuris.
444. Pro *tulerit* habet *poscat* editio opp. Frac. anni 1584.
449. Pro *sed tu* habet *quae tu* ead. ed.

---

#### NOTAE IN LIBRUM TERTIUM.

5. Sancta arbor ex novo orbe devecta est *Guaiacum* seu *Hyacum lignum* ex nove tunc detecta America allatum et pro primario morbi Gallici medicamento habitum. Editio Romana habet *canenda est*.



19. *Altoque* habent ed. Basil. et plures aliae, *alioque* habet ed. Rom.
32. Insula haec est Hayti seu St. Domingo, ab Hispanis Columbo duce eam primo attingentibus *Española* dicta seu Hispaniola.
126. Die duodecimo Octobris anni 1492 primo terra exspectata et paene desperata potitus est Columbus. Fuit haec terra insula *Guanahani* (San Salvador) ex serie insularum Lucayensium, quam post paucos dies iterum dereliquit, insulam *Cuba*, Antillarum maximam, quaesiturus, quam die 27 Octobris attigit, mox vero iter pergens *Hispaniolam* ipsam reperiit. Poëtice magis, quam geographice intelligendus est sequens locus, ita ut sub Anthylia Cubam, sub Hagia aliam Antillarum, sub Amerie ipsam Americam, sub Cannibalum tellure insulas maris Caraibici, sub Gyane insulam Gonave s. Guanaba, quae Hispaniolae iacet ad occasum, vel forsitan Guianam intelligas, et ut quae postea narrantur non fiant in Cuba insula sed in Hispaniola, uti aperte docet v. 33. Nam neque ab homine sub initio saeculi XVI. vivente accuratam illarum regionum cognitionem, neque a poëta accuratam descriptionem exspectabis.
135. Pro *Gyane* habet *Cyane* ed. Rom.
146. Pro *arva* habent edd. plurimae *ora*, Basi-leensis *aura*; nos lectionem editionis Romanae secuti sumus, Virgiliani illius memores: *Arva nova Neptunia caede rubescunt*. Aen. VIII. 694.
152. Psittacos hic intelligi a Columbi sociis frequenter in Antillis visos, non minus facile intelligitur, quam paulo post in versu 160 sq.



sermonem esse de pulvere pyrio a Germanis invento.

178. Ophyra dicitur hoc loco insula Hayti ob auri copiam ibi repertam vel speratam.

265. Atlantis insula a Platone commemorata maior fuisse quam Africa et Asia simul et periisse dicitur magno terrae motu. An America esse possit, olim cognita posthac deperdita nunc nove detecta, an potius alia regio nunc in oceani fundo posita, videant viri historiae tel-  
luris periti.


382. Versus insequentibus docent, Fracastorium originem morbi Gallici non ex America deducere, sed eodem tempore ortam esse dicere hanc luem in Europa, quo America detegeretur.

405. Denuo arborem Guaiacum alloquitur, de cuius laudibus totus agit carminis liber tertius.











m

g



